

邑人李昌運學

土物

夏書載梁州之貢鏐鐵銀鏤磬熊羆狐狸織皮蓋蜀部土物
琛麗自古然矣合川山則龍多華銀水則渠涪嘉陵滙流峽中
水陸所湊漫乎數百里間夙稱沃壤今如輿地故書類必備名
名必繁引毋乃蕪濫爲病抑通列無名而又毫不注釋采風者
何貴焉且夫土均之法土宜之法辨五物九等辨十有二土之
名物寧惟是周知廣輪之數侈草木鳥獸之蕃毓哉將以察民
生休戚觀民俗奢儉整齊其本末之職業高下其賦斂之適中
相與休養生息之俾沾膏澤而咏勤苦也爰就耳目所及前籍
可稽者分別彙列或爲他邑所同或爲他邑所異畧以己意綴
之庶使財貨黍穀於是乎資林木竹實於是乎植羽毛齒革蔬
食果蓏之類亦莫不以生以育茂豫繁昌第導其利而使之無
戕無棄已耳夫豈誇地利之饒也耶作土物掌錄

合川縣志卷十三 土物

一

穀百穀總名禮記月令孟春之月天子乃以元日祈穀於上帝重農事
也格物總論曰穀種之美者也其爲種也不一攷之前代有言三穀者
梁稻菽是也有言五穀者麻黍稷麥菽是也有言六穀者稻黍稷粱麥
麻是也有言九穀者稷秫黍稻麻大小豆大小麥是也有言百穀者又
包舉三穀各二十種者爲六十蔬果之實助穀各二十是也蓋人食之
則飽不再食則饑未有不資以爲生也然不種則不生不時則不獲故
古者重穀而務農焉種以時而生以時耕以時而獲以時人事盡焉地
利盡焉天時應焉苗而秀秀而實昔春而種者子粒耳秋而收者萬顆
也昔春而入土者升斗耳秋而登場者倉箱也國與民俱足獨不在此
乎故聖王必貴五穀五穀必麗乎土合川偉其區域美其林藪任土所
麗物產富饒其民力於南畝者無寸土之曠書稱厥土青黎統梁州言
也合適居其中之一部當以青黎爲準色與性質似亦各別論色則平
衍者多玄黃依山巖者多赤絳臨江岸多灰褐論土質則平衍者多壤
土依山巖者多礫土臨江岸者多沙土論土性則平衍者多肥沃依山
巖者多粗離臨江岸者多疏濶然稽其實則紅大衍泥紅沙大衍泥黑沙

大衍泥黃沙大衍泥油沙泥冷沙泥梭沙泥白塘泥死黃泥鵝卵石夾沙泥豆瓣泥盡之惟白塘泥死黃泥冷沙泥則土之劣者而已然而天之生物各適其宜穀分二種爲秬爲秠

粘穀原名秬稻秬與粳同乃稻穀之總名也莖小中空側葉長青頂開細小白花因風結實春分播種立夏分秧栽插秋至色黃穫稻肥田水田惟宜天年早乾不豐收也有富貴粘紅邊粘桂陽粘落烏粘五開粘油粘齊粘鴨粘鮮粘又有早種遲種之分曰烏腳早節間多烏紅色百日早種穫不過百日均宜乾田齊頭黃畧如蜀秠隨地可種桂陽粘太肥太瘦者均不宜鬚鬚穀有長有短二種均宜水田香穀米不適口宜種沙田大河南粘初種盛出穀二三年後宜易種田最肥者可種四五年和尚穀不芒亦不擇田六斗二穀一石米可六斗其穀壳薄也沙田向陽田最爲得宜

糯穀古今注曰稻之粘者爲秠卽糯也有堆子糯矮子糯猪油糯三顆寸糯三百捧糯又有陰陽粘其米一粒秬稔各半造飯釀酒均不宜可爲資早糯比尋常糯穀早十餘日成熟響穀糯穗長粒大殼外有稜其

合川縣志卷十三 土物

二

聲甚響佳種也蠻子糯粒畧圓黃殼糯殼色甚黃紅鬚糯芒微紅鬚糯芒長如鬚鬚穀白殼糯殼微白凡糯穀均遲穀也宜種肥田水田釀酒團資及作粉爲餹蒸而乾之爲陰米炒之爲炒米亦曰米花炒本作燻

高粱原名梁莖高及丈蘆穗有扁葉如劍頂抽長線開淡紅花結實如椒子赤黑色春分播種立夏栽之不需灰糞活時長更速夏至後結實粘者可烤酒糯者可資可釀可濟饑稍可爲帚莖可籬可爨最有利於民者合之永里西里來里以此爲大宗東里凡不出苞穀者亦閒種此孫炎注爾雅謂黏粟爲秠雀豹古今注謂秠爲黏稻蘇頌圖經謂秠爲黏黍皆因時地不同而歧其名又謂之粟周禮九穀六穀皆有梁無粟知古本同物而異名漢以後始以穗大芒長而粒粗者爲梁穗小芒短而粒細者爲粟也

麥古名來牟莖中空細圓側葉扁長頂開細小白花因風結實性甘美有大麥小麥之分九月播種宜肥田肥土河濱潮土肥田乾水布種以灰冬至前後鋤去野草鬆土注糞明年四月成熟所以爲麥秋也大麥先熟可製酒小麥後熟可造醬可磨粉挂麩製一切餅餌古詩云卧聽村村

打麥聲鳥鳴割麥插禾亦何巧也梢製草帽餘可蓋屋縣中以此爲大宗凡山邊河邊及平田皆是方夏舊穀既沒新穀未升二麥先熟爲接絕續乏之穀故春秋他穀不書無麥禾則書之蓋重之也

蕎子本作菽莖赤枝青葉作嫩綠色尖圓而小頂開小白花實有三稜老則黑去皮作粉可餅可麪可供家食亞於麥有甜苦二種有兩季春種夏熟秋種冬熟田土均宜河濱亦宜培以灰糞鋤去野草尤宜亦救荒年要品也

小米禾屬也原名黍宜植旱田李時珍曰穗小毛短粒細苗似茅種類凡數十有青赤黃白黑諸色或因地賦名早則有趕麥黃百日糧之類中則有八月黃老軍頭之類晚則有雁頭青寒露粟之類大抵早則皮薄米實晚則皮厚米小近有小米七層穀懶婆娘奈不何之諺

苞穀名御麥莖直立高五六七尺葉扁如箭鏃而大頂開天花腰結實如馬齒或扁或圓苞盈尺或黃或白頂有紅鬚鬚之多少卽實之多少也有粘糯二種種分早晚縣之農民除土宜種高粱外冬閒挖紅苕後悉挖土以待凡山閒河閒壩閒舉如之二月驚蟄點苞穀苗土看窩補

種苗如雞尾蕪一去非種用糞一次閒二十日蕪二每窩只留二苗糞二又二十日苗出天花腰作苞有紅纓開兜灌糞謂壯苞也至是而熟而老野有看守直至六月尾始收日如烈火曬極乾用聯械撻之心爲柴收其莖堆如柴山可半年炊苞穀可餐可酒可熬糖酒糟糖糟可飼猪用生料亦甚成算其賈去米不甚遠縣中惟華銀山種收皆遲餘悉同以六月收順慶屬多向縣中購取縣屬之產秔秫外此爲大宗

脂麻卽胡麻因多脂故名脂麻莖方葉圓二月尾種秋開白花隨節結莢長寸許四稜六稜或七八稜不等有子分黑白二種皆可榨油春逢早乾農多種之然亦無成大莊者相傳張騫得其種於西域故名胡麻爾雅翼曰巨勝胡麻之黑者宋嘉祐本草有白油麻是也又曰麻有實者別名苴而無實古別名臬養生要集曰麻子味甘無毒補中益氣服之令人肥健麻子一名麻蕒一名麻勃

豆總名也又名菽其類甚繁黃豆爲大宗託地甚微農家率以田畝及浮淺土種之二月以小鋤尺餘鋤頭倒春爲窩如酒杯大布以豆用灰少許土則以小鋤撥一口僅容數子覆以灰五月初遂花而實纍纍然

如珠貫葉可飼猪梗可炊豆爲佐食常品有食館磨豆作乳爲豆花以生活者卽豆花榨乾之爲豆腐切而以鹽醃之幽於甌令柔爲腐乳徒煮豆以鹽幽之爲豆豉黃豆爲巨產涪江一帶船載甚多有八月黃同此類十月黃則無烈日曬之用稍遜此二豆乃山土種也又有綠豆以色名也皮寒解金石砒霜草木一切諸毒比黃豆小春暮種夏間熟結實莢中厯時無多莢黑撿之旋撿旋實不一花也有油綠豆有糠綠豆亦有純黑而潤者皆寒性暑月多雜米中煮粥避暑佳品也又磨粉爲粉料中第一類次則紅飯豆結實莢中亦旋實者實比綠豆較長多粉料縣產爲多冬飯豆粒如綠豆圓種蒔同二月必至十月始熟味視飯豆而美巴山豆牛打腳豆此二種山種也其有附竿而生者曰四季豆葉圓而青花色紅白結實莢中扁而圓有紅有白有麻驚蟄播種清明採食五月尾始收嫩者可入鹹菜然不可久炊食可煮可煎可爲鮮曰豇豆莖蔓生莢長尺餘而軟俗呼羅裙帶莢短者短豇豆四五熟俱可連莢煮食可煎可鮮能充饑也春季之菜以此爲佳至於鹹菜乾濕均宜縣中人家以此供半年之腹盧廉夫教人空心煮豇豆入少鹽食之

補腎氣也曰刀豆莢長尺扁厚性淡平葉稍大清明播種六月採食九月收嫩者連莢采作鹹菜乾濕均宜其附樹而蔓者蛾眉豆莢二三寸濶寸許子黑而圓種收同上可佐食菹豆本作扁亦名羊眼又名沿籬蔓生花如小蛾莢生花下莢軟者茹莢甚美莢硬者茹子亦美老則取子乾爲扁豆白者入藥性得中和脾之穀也其以九月播種者一葫豆莖方正中空葉圓厚花烏白結實莢中莢四寸許味甘性涼三四月采收種時下以灰糞不糝不糞花時但無冷風結實則莖數十莢可佐食可磨粉冬糧以此爲最縣屬農人無家不種一豌豆柔軟伏地而生葉圓花紅白有蜜計結實莢中實甚圓有黃白麻三種蒔如葫豆磨料爲佳麻豌豆佳嫩苗可茹東坡云菜之美者吾鄉之巢注蠶豆者巢菜也凡此皆謂之菽古云菽水承權貧士養親之樂 右穀類

菠菜原名菠薐唐太宗當陽尼菠維國獻菠薐菜類紅藍卽此也葉似薺而尖根紅味甜北人又呼爲紅根菜八月播種生長頗速初茁土時每窩留二三本後以刀分其根饒有清致煮食最佳蘇軾詩北方苦寒今未已雲底菠薐如鐵甲豈知吾蜀富春蔬霜菜露芽寒更茁

冬莧菜原名露葵葉圓有紋柄小附臺色青味甘肉質而小七月播種九月陸續采食僅留根葉有柔細毛經霜愈滑美和梗煮湯色香味俱佳旋生旋采然冬日生最不易二月春濃蓬蓬發生殊不如冬日美甚漸老而花而實爲收種計則不采食實如珠圓而扁剖之有四子也蒿筍名蒿苣似筍故以筍名葉扁而尖有肉臺高盈尺大如酒杯味甘七月播種八月移栽葉叢生亦有不實而圓者漸有臺遂可食剝之或醃以生食或煎或湯陸續栽種至冬而春而夏城中一年嘗八月食此也種子留其巨者開黃花結實有芒宜種園圃肥土宜清糞

青菜一名蔓菁一名諸筍菜根多肉扁圓葉大邊邊有齒層層附臺色青翠性淡八月播種九月移栽各成行列常培以糞使隆隆然因而剝之或醃而食亦煮食至次年正月或二月初收作鹹菜乾濕均宜濕可一年二年乾則可數十年貯也或無鹽亦能久貯其葉微香作黃色食用焯椒和鹽無不可也去葉而梗及莖生食可煮可煎可鮓雖盛饌必伴之菜之佳無如此者有羊角有鳳頭有棍子有紅青菜兼可醫牛有冬菜種類甚多縣中無家不注意於此城市亦必采買爲炊食計出

蓄甚多今又有收而榨乾之微拌以鹽爲榨菜銷行甚廣劉禹錫嘉話錄云諸葛亮所止令兵士獨種蔓菁者取其纔出甲可生啖一也葉舒可煮食二也久居則隨以滋長三也棄不吝惜四也回則易尋而采五也各有根可食六也凡諸蔬其利甚溥至今蜀人呼爲諸葛菜白菜原名菘色白味甘如青菜而白味甘層層護心者種出遂甯七月買子下土至八月移栽成行列培以清糞葉大滿土中心遂裹而緊至成時先去其不裹者賣於市兼運至重慶發賣鄉則賣於街供家人日食兼爲年節用也或煎或煮或醃各適其宜附城園戶尤以白菜爲大宗又有土白菜種蒔亦同特不裹心亦無如此白色用以小炒味亦醴醴至腊月播種正月分栽四五月食者則有蓮花白菜種出成都園戶取以備一種鄉中亦間有之其莖離土六七寸不等葉微圓團生頂上葉裹如毬可煎可煮可入鹹菜莖剝去粗皮亦白嫩而脆可醃食牛皮菜原名恭音通甜亦名甜菜長青色中白而肉似白菘八月播種十月采其邊葉食之心抽葉漸復初三月心抽莖而花而實盡拔去葉可飼豬其根葉經枯燒灰淋汁洗衣如白玉色作種留一二本足矣

角耳菜葉青圓而大中有白坭附臺臺四圍有角有甜汁八月播種冬月采食二月開花結實存種嫩時臺與坭可鹹菜可炊食

大頭菜有二種一葷葷大頭菜菜如葷葷根圍五六寸易老一蘿蔔大頭菜葉如蘿蔔根圍尺餘且不易老今人多種蘿蔔者八月播種九月十月分栽腊尾拔得曬當風處元宵後取洗曬乾用刀剖開和鹽入甌四五月翻甌洗曬以鹹爲佳仍用甌倒覆愈陳愈好用以熬湯極味也遵義府志大頭菜桐梓縣產雲南稱樹頭菜州縣並產

蘿蔔一作萊菔一作蘆菔早食晚食微分早食者七月布種生而芸芸即可食留三本四本一窩不時灌溉漸下根漸具形有紅有白有紅白各半視土出之梗可辨也醃惟去葉和梗和根可入甌煮食可取白色者次第取之盡而後已其用以作種者去葉去根鬚仍入土栽立後春後長臺多旁枝二月而花而實結子圓而扁紅者白子白者紅子不相紊也晚食一種多白色有粉團蘿蔔形團有沙鑽蘿蔔形禿有繫馬椿蘿蔔形長九月布種生時祇留二本冬月芸去一本時而賣之可煮可炖可鮓可燒可煎但立春則空而織維如布且長臺矣故蘿蔔每於春前

盡拔去填街塞巷以供年前食品或風或醃或蜜作糖爲曬絲其鹹菜供半年之久縣屬一大宗也又有一種名熱蘿蔔圓長五月食不如冬時爲宜也李時珍曰萊菔乃根名上古謂之蘆菔中古轉爲萊菔後世訛爲蘿蔔南人呼爲蘿朶與雹同見晉灼漢書注中今天下通有之也大抵生沙壤者脆而甘生瘠地者堅而辣根葉皆可生可熟可菹可醬可豉可醋可糖可腊可飯乃蔬中之最有益者而古人不深詳之豈因其賤而忽之抑未諳其利耳又云江東居民言種蘿蔔三十畝計益米三十斛則知蘿蔔果能消食也又制麪毒故名來服來麥也胡蘿蔔三伏中布種苗如蒿莖有白毛微辛臭冬日掘根生熟可啖兼果蔬之用有黃白二種長五六寸似鮮掘地黃及羊蹄縣屬凡河岸沙土皆種之爲年節品屆時舟載如梭盛行重慶而酆都一帶尤視爲奇珍云

油菜葉青味淡莖高肉脆根細而堅性味芳香有高矮二種八月播種十月分之三四月成收宜肥田肥土河濱潮沙培以清糞蔣以時日結實有莢長寸許多子可榨油渣可肥田飼豬莖可充薪可代柴山備蠶

上樹縣屬河岸及沃土多種此其油渣通謂之菜餅

雪裏紅又名紫菜原名萼臺葉大色濃綠九月播種十月起臺有紅白二種臺甚嫩旋折旋生沿街喚賣或醃醋生食或菜油煎食均宜僧寮尼侶種此以爲伴食上品三月末始罷李時珍曰此菜易起臺采其臺則分枝必多故名油臺淮人謂之臺介卽今油菜爲其子可榨油也羌隴氏胡其地苦寒冬月初種此菜能歷霜雪種自胡故服虔通俗又謂之胡菜昌運按今之油菜不能采其臺爲食故以紫菜屬之紫菜自冬月采食至三月末猶可食油菜則三月結子久矣

葱一名芘一名菜伯一名和事草一名鹿胎葱一名大官葱葉中空成管高近尺俗有七葱八蒜之說謂七月種葱也播時分一粒入土卽生旋采旋發碎切蔥花嘗入羹菜三月老去土內葱白增多一簇矣葱白有發散通氣故能解毒及理血病血者氣之帥也氣通則血活保昇曰葱凡四類冬盛夏衰莖葉俱軟美又有火葱一種與常葱微異

蒜一名葫葉細長畧扁有地下之鱗莖葉皆供食用氣甚辛烈能助味久食損目李時珍曰家蒜有二種根莖俱小而瓣少辣者蒜也小蒜也根莖俱大而瓣多辛而帶甘者葫也大蒜也大小二蒜皆八月種春食苗夏初食臺五月食根秋月收種亦有獨根無瓣者謂之獨蒜野葱原名山韭野生根白葉如燈心性與家韭相類山中往往有之士人呼爲野葱以和蔬甚香美貧兒罄易於市亦微利也

芹菜有稜中空色白枝繁葉碎味苦辛小品也春時發生舊地八月開花結實十月布種到年節已成穗矣可羹可炒縣中賣者率在新春古詩云桃花醋好醃芹甲饒有雅人深致

韭一名草鍾乳一名起陽草莖名韭白根曰韭黃花古名菁禮記謂韭爲豐本言美在根也薤之美在白韭之美在黃黃乃未出土者周顛曰春初早韭以其溫補故曰鍾乳也

苦藟原名薤狀似韭而中空夏開細花莖如小蒜八月種苗可醃食常分之喚賣沿街次年五月鋤其根謂之薤白禮曰切葱若薤卽此

鵝腿藟形似薤而稍長大如鵝腿色白有兩季八月種苗如韭四月倒苗挖出復入土八九月仍挖出可醃食可和肉煮可列饌作鹹菜甚脆久則酸極善作鹹菜者於酸極時出甌曬乾用甌倒覆之久則甜愈久愈

佳

蓴苳一名胡蓴葉細裂鋸齒八月下種冬季春初小品也可醃食可調湯味羊肉尤宜

魚香莖短葉尖圓而青根有紅色春初發生夏秋開小白花小品也宜烹魚香極濃凡湯可入之入蔞椒內食豆花尤宜

蔞椒葉扁小而尖莖小而多枝花色小白味辛辣爽口消食小品也春分播種移栽每四五本一窩忌糞尤忌晨初蔞治惟以水和溺注之四月盈尺開花結實初次宜嫩食否則落以後結實而青而紅始可耐久陸續采摘九月始收其形或圓而扁尖而長食各物所必需用作鹹菜可乾可濕供數月之食煮鱸亦佳李時珍曰蔞味辛辣如火焊人故名亦作蔞又光緒丙子年張之洞督學四川覆試重慶詩古以海椒賦命題字作海遵義府志郡人通呼海椒亦稱辣角園蔬要品每味不離鹽酒漬之可食終歲其形狀有數種長細角似者名牛角海椒細如小華頭叢結尖仰者名纂椒二種尤辣一種扁圓色或紅或黃味不甚辣名柿椒又一種大如酒杯肉厚味甜不辣成都皆有之種於縣則變

莧菜有莖葉橢圓或似柳葉有青赤二種如椿樹然采嫩而食宜蒜宜蔞椒二月播種三月可食至六七月開花有芒子如茱子而黑其莖可飼豬又有灰莧菜形畧似莧而甚大中有堅臺可爲杖生荒土中嫩時采葉飼豬埤雅云莧之莖葉皆高大而易見故字从見會意字

茄子一名落蘇色青紫白三種形正圓長圓橢圓不等葉大而圓花必實有瓢瓢有子如脂麻縣屬臨渡河有農戶精於此播種時作竈微火使地常溫先春而種蓋以柔草臨春茁芽常灌溉秧苗視人爲早分栽土中一心灌溉先花先實四月中旬卽已入市喧賣縣之營茄者瞠乎後矣渠家世以種茄爲絕技紅者先市白者後市

菌同蕈隱花植物之一種其狀如傘有蓋有柄生山野樹陰及朽木上種類甚多皆爲柔軟組織以地中菌絲爲本體無葉綠質色或黃或白或褐或紫繁矣哉揚雄蜀都賦瑕英菌芝蜀語地芝曰菌音郡菌之美者名鬥雞菰生桑樹上者名桑雞生櫟松林中有黃白赤綠四種可食其面上如石灰者殺人用黃土和水漿食之可治又音捲夏月天兩生山中石骨上土人名地菌皮可食田居蠶室錄夏菌五六月秋菌八九

月雨後種類至夥俗隨形呼其大腳菰青糖菰刷帚松花黃綠諸種爪其蓋卽出白汁名茶菌又名羊奶菌尤香美又一種名凍菌形半圓肉之軟嫩勝楊妃乳生樹頭上四時有之不能乾蓄凡菌有毒者經炊烟薰乾卽無鬪雞菰一作豆萁生豆畦中也又三巴菰蕎巴菰亦美菌地蠶莖柔蔓生二月茁苗方莖對節狹葉有齒四月開小花成穗結子其根連珠如老蠶五月掘蒸煮食可爲菜可充饑

藕蓮之母也莖下白莢在泥中者中有七孔每節臂相似肉白其間有絲味甘脆解暑渴初春栽七月掘藕可生食可炒食可炖食可爲鮮可磨爲圓兼可爲粉

筍一作笋竹根所生之芽外有籜包裹漸長則籜解而成竹初出土時可爲食所產有慈竹筍俗名篁笋味涼七月食之三月有水竹筍五月有斑竹筍七月有刺竹筍最遲而嫩荊竹筍苦竹筍以時而生桃竹筍生四季冬筍則破土而得縣屬有之

藤藤菜原名薤菜莖柔如蔓中空如竹又名空心菜三月栽肥田或土中蔓引而長采其嫩尖食之每節發生繁盛爲食甚便李時珍曰薤菜性宜濕地畏霜雪九月藏入土窖中三四月取出莖以糞土卽節節生芽一本可成一畦也幹柔如蔓中空葉似菠薐水陸皆可滋生

染漿葉又名虎耳菜二月播種三月茁芽尺許有藤有葉濃青厚圓用長竿令纏使滿四五月發生已繁葉滑極可湯食煮豆腐俗謂天青地白或用作菜豆花佳品也至九月開花結子而青而紅而落閱年自生李調元來其詩曰近來漿果紅於染

芡筍原名芡蒿有夙根宜肥田春初葉似艾而潤背密生灰白之毛厯夏高四五尺心生臺秋日開花秋末有筍含包而出可佐肉食可炒可羹每年移根洗濯極潔種之則無黑脈經年不洗不另種則黑脈生矣陝人謂之芡白本草綱目一名芡草一名蔣草江湖陂澤中皆有之葉如蒲葦刈以秣馬甚肥初生白嫩如筍謂之芡白生熟皆可啖

紅苕原名甘諸莖細蔓引葉圓有尖花紫白壯如喇叭根形圓而長二月布種肥以糞三四五月陸續牽蔓分栽或種苞穀卽點苞穀行中亦可分栽六月苞穀高粱收成其蔓顯出從而翻之或上行上行使苕地獨高相間以溝也苕從蔓節下根屢翻則根下得氣爲旺可以滋長八

月陸續挖苕有皮紅者有皮白者縣中或多種他縣種易地爲佳信然立冬後苕在土必爛蓋畏霜雪故也以前挖者亦必入窖農民以苕爲大宗供數月食異物志甘藷南方民家以二月種十月收之其根似芋有巨魁大者如鵝卵小者如雞卵剝去紫皮肌肉正白如肪南人當米穀果食炙皆香美初時甚甜經久得風稍淡田居蠶室錄俗呼韶薯聲之轉有紅白二種山農廣種者收多三四十石卽煮以當糧亦有碎切和米作飯一種充園蔬者名雲板薯又名腳板薯草墩薯皆以形名大者經一二尺肌白甚蔓間有子蓋所謂白苕也紅卽胭脂苕也又一種名過冬苕經冬不爛可以隔生隔生者俗謂留根自生也

芋別名蹲鴟生水田中亦種肥土正月播種二月中分秧葉小如荷之錢漸大特不如荷圓一端從心直破莖多麻點四圍小芋附之陸續剝葉可飼豬亦使小芋得遂其生植也八九月掘而食之花有巨苞華柄色綠者爲青芋色紅紫者爲紫芋味甘肉脆可佐几筵可伴食可鮓可煮食品最佳者邑產爲饒又一種葉尖圓色青可充饑俗呼洋芋華銀山多有之然不若他邑之盛又可爲腐者爲磨芋遵義府志益部方物

合川縣志卷十三 土物

十

贊芋種不一鷓芋則貴民儲於田可用終歲王維詩巴人訟芋田羣芳譜芋在在有之蜀漢爲最東坡雜記蜀中接花果皆用芋膠合其罅卓文君云岷山之下野有蹲鴟至死不饑

○森楷案磨芋古名蒟張騫所見之蒟醬卽磨芋豆腐也莖葉皆與芋別

瓜種類甚多皆以所結之實名之葉或如掌或碎小或分岐或捲鬚其花多黃色春種夏熟秋萎多可食以皮色名者曰黃瓜白瓜絳瓜黃瓜宋名胡瓜張騫西域得種胡瓜北人避石勒諱改名黃瓜今因之宜竹或樹枝引蔓攤子坎袁家巖臨渡河出最繁盛白瓜卽冬瓜俗呼毛冬瓜不需蔣糞惟低作架縣中園戶用杉樹爲架寬廣數丈數十丈不等瓜長二三尺大如桶上白霜沿畦一望皓乎無垠皆瓜也廣雅一名地芝本草注云經霜而上白衣如粉益氣耐老除心胸滿去頭面熱熱人食之佳冷者食之瘦絳瓜結實短圓其色黃白炊食極美以方位名者南瓜葉圓而大蔓長中空根柔多鬚各地皆盛牛鼻峽焦巴石以油炒而高聳瓜尤甜而味永上下船舟買而食之每年瓜子以石計遂甯縣志種出南番故名葉如蜀葵大如荷葉形如西瓜而身有稜經霜收置煖處可留至春以氣味名者曰苦瓜葉碎而大宜去旁枝性涼去暑子

可煎食一名錦荔枝一名癩葡萄原出南番皮上疝癩如癩及荔枝殼熟則黃而自裂有紅瓢味甘可食以形態名者曰絲瓜線瓜瓠子瓜筍瓜絲瓜葉圓而青蔓長橫牽籬邊結實長而小宜湯宜煎湯宜去皮又有八稜絲瓜極脆宜煎不去皮絲瓜老則筋絲羅織故名去其黑子待種筋絲如麻布用以揩拭洗腊肉便甚線瓜色青而圓視黃瓜尤大煮熟自成線狀如細粉然瓠子瓜白圓而大味甘肉軟五月采食筍瓜結實短圓其色黃白味甘肉脆如筍其地下莖曰地瓜形有長圓此瓜之異者

右蔬類

金鍼花卽黃花古名也萱草原作護與媛同生下濕處葉狹而長根多肉新舊相代四時青翠鄉居植菜圃五月抽莖開花六出四垂朝開暮薦曰黃花曰金針皆以色狀之本草注云妊婦佩其花多生男故名宜男菸草一名淡巴菰葉大形橢圓而長可製絲菸之屬其種由呂宋傳入因其有刺激之性能解疲倦故人多吸食爲嗜好品之一種含有毒汁種於山土者山烟種江岸爲河壩葉子山菸供土人吸食河土所種消運最遠縣之農民未嘗不以爲利焉

靛古名藍可爲染料葉橢圓而青莖多節長約四五寸花色淡紅味辛苦含藍汁取其莖葉和石灰入靛塘沈澱而成謂之靛二月栽植四月始刈月餘再刈或經三刈三刈後連根拔去入窖存種避霜雪凡陰山潤浸土地製有靛塘皆種靛也製成向各染房發賣
茜草蔓生莖方中空葉長卵形葉柄與莖皆有刺夏季開小白花實黑色根可染絳

夏枯草野生苗高四五寸許其莖微方葉對節生有細齒背白莖端作穗長一二寸穗中開淡紫小花一穗有細子四粒冬至後生葉春夏之交開花作穗五月便枯故名

車前草人家及路旁多有之春初生苗葉布地中抽數莖作長穗如鼠尾花甚細密青色微赤結實如葶藶赤黑色葉有筋以五疋筋及十三疋爲是三疋筋爲蟆蝦草不可用也

穀精草收穀後荒田中所生莖葉俱青花色白圓小似星故亦名流星草

虎耳草多生陰濕處人或栽於石山上莖高數寸有細毛一莖一葉葉

大而圓可入藥面青背紅夏開小花如蝴蝶形色淡紅
通草高丈許葉大似荷而肥其莖空心中有白瓢輕白可愛女人取以
飾物亦可利水治淋

益母草越年生一名茺蔚莖高四五尺葉畧似艾三裂或五裂夏初開
淡紫色花產婦服之有益故名

蒲草葉長四五尺形扁而性韌軟可編蓆及束物用宜栽水澤中

燈草叢生水澤中莖直而長可編蓆其心可和油燃燈作燭並入藥

茅草葉扁長而青根尖細色白春季生苗夏則繁盛農家多刈以飼牛
根可入藥

清明草葉厚莖有茸色微白開細黃花味微甘嫩時取和米粉作饗餅
可食以清明節食故名古爲茸母宋徽宗詩茸母初生正禁烟也

狗尾草叢生葉綠而長花穗直出上端如狗尾形故名

馬蹄草莖細長而柔葉圓小根味苦辛春發冬枯麴藥用之有大馬蹄
草其葉如碗口大醫小兒瘋疾妙藥也

肺金草莖細短葉扁長根柔多鬚頂有小白花一朵可治咳嗽

合川縣志卷十三 土物

十二

伸筋草長寸許葉扁小有黃毛根細而淺四季不變其體外科用以舒
筋活骨生深山曠野

鐵線草莖長而柔葉青小而尖根細而軟味辛性淡外科用治損傷四
月蔓延地上長尺許農家刈以飼牛然最爲治地者所惡

地丁草莖圓小中空斷之有白漿葉尖小扁長根柔而尖味辛苦正月
發生二月開花絮圓如團遇風揚去根葉可和肉炊食用以醫瘡

蓼子草多生水邊莖粗如拇指有毛葉狹長色淺紅初秋開花成穗有
馬蓼赤蓼紫蓼數種通稱紅蓼秋深子成扁如酸棗仁而小其色赤黑

惟肉白

紅草蓼類苗高五六尺葉長卵形而尖葉柄長莖葉密生淡紅色之毛
秋日開花成穗色紅可染物並入藥

芭蕉望之如樹株實則草本大者合抱葉長數尺或丈許廣尺餘其莖
虛軟如芋根如芋魁花著莖端甚大如蓮花形各爲房實隨花長每花
各有六子先後相次子不俱生花不俱落

浮漂古名萍同蘋水生植物之一種常生肥田中有紅白二種體皆扁

平面背異色有一鬚根下垂

藻水草之總名其莖周圍色綠葉作鍼形與松相似俗呼藻草

白蒿原名繁上有白毛粗濇葉似細艾又曰艾蒿古以爲菹

苔隱花植物之一種叢生濕處及石上有青綠褐諸色根與莖葉之別不甚分明有葉至微細者有全體扁平者外觀畧似蘚下等植物也

篇竹原名扁蓄春季布生道旁柔莖引蔓葉厚綠如竹夏開小花色白微紅

水蠟燭叢生水澤邊形與燭肖故名李調元詩竟是天生燭居然照滿川卽此

水燈心形如燈草長尺許性清涼可八藥

仙桃草生麥圃中葉如茅蓬生多莖春時頂開小花結實有蟲含實中穀雨前後乘未熟時采之熟則蟲飛不可爲藥

剪刀草生水田中葉如剪刀分開青色多根根甚固最害苗插苗後叢生田中田家惡之芟除必盡

側耳根葉圓面青背紅二三月盛出遍地皆是可生食又可用鹽少許

以酒醋醃食荒年雜詠卽葢菜越王遇荒採葢是此呼葢爲側者聲之訛

苧麻莖空葉面青背白根肉質春至發生頗速歲三收或四收秋後開花結子八藥可爲布爲夏日常服縣屬家習麻然不甚貴重今布賈昂宜留心及此遵義志載戊己編園林之麻有二種有坐莖麻叢生稠結莖大而皮薄其子種生所謂傳子不傳根者也有竄根麻根次第四散莖小而皮厚其子不生所謂傳根不傳子者也二者竄根良每年皆兩刈夏則五月秋則八月刈時取其幹刮去粗皮暴乾取皮績爲縷用稷草灰水煮經宿搗洗之愈洗愈潔近人生利指南有苧麻種植法麻性喜乾燥而惡淤濕尤畏北風不宜栽於向北之處正二月間先將土耕翻極鬆深約一尺五寸土之周圍及中間宜設深溝栽植期間以春分後立夏前爲宜栽時只將嫩根分劈取用其老根下垂如芋者俗謂之麻肚棄之不用以其無萌芽之可生也去淨麻肚之嫩根每一株約可劈栽五株株間距離約在一尺七八寸內外每年春三月麻初長時及五月甫剝後須耨耪一次每年冬必挑土以培其根約兩株須土一擔

以塘泥爲最好年年如此不可閒斷蓋麻根向上行不培則不生發也麻性受肥宜上糞餅其法用餅研細末冬令灑於其上旋挑土以覆壓之母令被風吹散每畝約用餅百觔收剝之期夏令約在五月栽秧後秋令約在九月割稻後視麻之皮色轉灰黑至梢則可剝儘半月內須剝盡過早則太嫩過遲則漿乾剝法用手平根折斷先連皮取之而棄其穢旋用清水洗滌一過再用鐵管一約長二寸畧粗於指鐵刀一約長二寸餘潤近寸其端有短柄曲而下垂將管套於右手大指將刀厭於右手食指而握其柄於掌其刀口向上形同仰瓦俾兩指用力以箝其連皮之麻然後用左手抽之而其皮得以盡去將皮去盡後急暴於日中否則麻色黑滯而價值遂減

棉花一曰古貝通鑑梁武帝木棉阜帳史炤釋文木棉江南多有之春二三月下種生黃花結實熟其皮四中綻出如綿土人以竹爲小弓牽弦以彈綿卷爲筒就車紡之自然抽緒如縲絲狀其實非木本也莖高二三尺而柔葉如掌二月播種六月開花花五瓣色黃結實如桃熟則裂之爲三出棉花婦孺檢回裂棉出子子可榨油花爲紡紗織布之用

近日花賈甚昂縣屬惜無人提倡近人有種植木棉法選種棉子分數種有綠毛者有光黑者其性有宜海邊有宜山地有宜尋常種棉之地光黑種子小毛細而長其棉輕柔綠毛種子大毛粗而短其棉肥種光黑種卽西人所稱海島棉花爲最上等然內地亦能種植惟數年後須換新種否則日久亦變成綠毛種綠毛種子絨皆結成塚故俗名塚花亦頗合用其不如光黑種者因花易沾泥色不潔白又光種去子甚易毛種去子甚難可紡佳綫造布亦結實平滑土質種棉之地以有泥沙炭灰之質者爲上此種土質又以有三層土爲上有三層土又以中間一層爲上總之土貴潔淨若將淤積之地疏通及尋常所稱肥田用之種棉棉葉雖茂花實不多且質亦不良下種種棉莫妙於去年種豆之地先於秋後用犁將土墾鬆凸起成行每行約隔三尺半鑿淺孔用手密放棉種俟棉生長二三寸復用人工除去瘦者每孔留棉兩條每條相隔約尺有半種棉時必將本日所種之種用手揉散揉完少加以水然後加土種少則用手揉種多用耜耨開耨時務宜小心勿令種子傷損惟令不粘成餅爲度但須現揉現種預早揉之恐防乾壞時令棉下

不借土生者栽時捶其皮含巨石覆以土落葉復發以後對其時日發葉開碧玉花花落結子極圓如小鈕狀吳省欽黃葛樹攷趙光祿文哲黃果樹歌果特葛之轉音自敘州而下樹漸多漸大蔭漸廣水經注有黃葛峽宋熊本敗瀘州柯陰夷作黃葛下蘇子由自江陽見之以爲嘉樹獨怪子瞻致能務觀諸公無一語及之

青桐樹高二三丈葉似栗葉而大開黃花結子有外殼其木可供炊爨之用含燃燒性最富爲薪蒸上品縣治自華銀山下迄草街子接連多山多種青桐以五年賣一次屆期輪賣賣於碗廠爲碗柴賣縣治炊爨爲州柴砍者自砍生者自生其利無窮間有專習一者爲舟人船底其賈尤昂古謂之樗亦謂之櫟有橡櫟胡櫟二種

黃桷樹高數丈徑數尺枝葉最茂鳥鵲多巢其上木理色黃可供造船及炭窰內路板之用油坊以作榨壳尤佳俗謂之黃櫨樹

櫨讀林之陰平

羅漢松葉長青不花而實其實儼如佛像小如豆色灰白或紫黑花園間有之

老茵茶樹高數丈葉形似白茶色褐四時不彫其皮每年脫換一次花

合川縣志卷十三

土物

十五

開於夏季香遠益清葉與皮作茶亦佳老山常種此樹惟雲渠鎮平家溝稱爲特產平以寬箸有茶樹記異

漆樹葉爲羽狀複葉花小色黃序如圓錐形實小扁圓平滑其皮內有黏汁可髹物俗分大木小木二種小木較佳屬縣間有之

鐵籬笆刺棘之屬葉尖有花有子質軟可編爲籬其幹老則堅黑如鐵故名古所謂鐵蒺藜也

鐵棕幹巨而矮質硬健枝葉長五尺許葉黃後可取爲薪俗名鳳尾棕惟廟地有之

柏子古名鴉舅性堅質粗葉圓嫩時擣以染布秋老作深紅色子可榨油木可爲製絲棉眠板之用以雞矢發之則起細眼如蜂窩乃適用檀木樹性堅葉青而扁圓冬則凋根堅多鬚生長頗速可製農器

千年矮卽黃楊樹性質堅緻枝繁葉茂尖小而青根多堅鬚幹矮而小木色黃白可□什物玩具相傳年長一寸遇閏則退一寸爲厄閏也

羊矢桃葉扁小色白性柔幹長而小五月開細小白花映綴甚多結實尖小生青熟黑如羊矢味甜可食多植園林土壤古名羊棗

爆蚤樹性堅質粗葉青而扁圓經冬不凋根長而堅出長頗速可架草屋古謂之冬青樹一名萬年枝俗呼爆蛸蚤以然燒有聲似之茨五甲樹其樹直幹無枝多茨葉大有鋸齒色青長最速十年高可數丈可造屋

楓香樹楓香似白楊葉圓而岐分有脂而香其子大如鵝卵二月發華乃著實八九月熟暴乾可燒 右木類

牡丹花王也名富貴花春初於莖上發嫩芽三月開花有大紅粉紅紫色諸種人甚珍之歐陽外集牡丹記牡丹之名或以氏或以州或以地或以色或旌其所異者而志之姚黃牛黃左花魏花以姓著青州丹州延州紅以州著細葉麤葉壽安潛溪緋以地著一摭紅鶴翎紅朱砂紅玉板白多葉紫甘草黃以色著獻來紅添色紅九藥真珠鹿胎花倒暈檀心蓮花萼一百五葉底紫皆志其異者姚黃者千葉黃花出於民姚氏家此花之出於今未十年姚氏居白司馬坡其地屬河陽然花不傳河陽傳洛陽洛陽亦不甚多一歲不過數朵牛黃亦千葉出於民牛氏家比姚黃差小真宗祀汾陰還過洛陽畱宴淑景亭牛氏獻此花名遂

著甘草黃單葉色如甘草洛人善別花見其樹知爲某花云獨姚黃易識其葉嚼之不腥魏家花者千葉肉紅花出於魏相仁溥家始樵者於壽安山中見之斲以賣魏氏魏氏池館甚大傳者云此花初出時人有欲閱者人稅十數錢乃得登舟渡池至花所魏氏日收十數緡其後破亾鬻其園今普明寺後林池乃其地寺僧耕之以植桑麥一作棗花傳民家甚多人有數其葉者云至七百葉錢思公嘗曰人謂牡丹花王今姚黃真可爲王而魏花乃后也韉紅者單葉深紅花出青州亦曰青州紅故張僕射齊賢有第在西京賢相坊自青州以駝馱其種遂傳洛中其色類腰帶韉故謂之韉紅獻來紅者大多葉淺紅花張僕射罷相居洛陽人有獻此花者因曰獻來紅添色紅者多葉花始開而白經日漸紅至其落乃類深紅此造化之尤巧者鶴翎紅者多葉花其末白而一作其本肉紅如鴻鵠羽色細葉麤葉壽安者皆千葉肉紅花出壽安縣錦屏山中細葉者尤佳倒暈檀心者多葉紅花凡花近萼色深至其末漸淺此花自外深色近萼反淺白而深檀點其心此尤可愛一摭紅者多葉淺紅花葉杪深紅一點如人以手指搯之九藥真珠紅者千葉紅花葉

上有一白點如珠而葉密蹙其藥爲九叢一百五者多葉白花落花以穀雨爲開候而此花常至一百五日開最先丹州延州花皆千葉紅花不知其至洛之因蓮花萼者多葉紅花青趺三重如蓮花萼左花者千

葉紫花

一有出民左氏家

葉密而齊如截亦謂之平頭紫朱砂紅者多葉紅花

不知其所出有民門氏子者善接花以爲生買地於崇德寺前治花圃有此花洛陽豪家尙未有故其名未甚著花葉甚鮮向日視之如猩血葉底紫者千葉紫花其色如墨亦謂之墨紫花在叢中旁必生一大枝引葉覆其上其開之比他花可延十日之久噫造物者亦惜之邪此花之出比他花最遠傳云唐末有中官爲觀軍容使者花出其家亦謂之軍容紫歲久失其姓氏矣玉板白者單葉白花葉細長如拍板其色如玉而深檀心洛陽人家亦少有余嘗從思公至福嚴院見之問寺僧而得其名其後未嘗見也潛溪緋者千葉緋花出於潛溪寺寺在龍門山後本唐相李藩別墅今寺中已無此花而人家或有之本是紫花忽於叢中特出緋者不過一二朵明年移在他枝洛人謂之轉音篆枝花故其接頭尤難得鹿胎花者多葉紫花有白點如鹿胎之紋故蘇相禹珪宅

合川縣志卷十三

土物

十七

今有之多葉紫不知其所出初姚黃未出時牛黃爲第一牛黃未出時魏花爲第一魏花未出時左花爲第一左花之前唯有蘇家紅賀家紅林家紅之類皆單葉花當時爲第一自多葉千葉花出後此花黜矣今人不復種也牡丹初不載文字唯以藥載本草然於花中不爲高第大抵丹延已西及褒斜道中尤多與荆棘無異土人皆取以爲薪自唐則天已後洛陽牡丹始盛然未聞有以名著者如沈宋元白之流皆善詠花草計有若今五字一作當之異者彼必形於篇詠一作什而寂無傳焉唯劉夢得有詠魚朝恩宅牡丹詩但云一叢千萬朵而已亦不云其美且異也謝靈運言永嘉竹間水際多牡丹今越花不及洛陽甚遠是落花自古未有若今之盛也本草牡丹出巴郡山谷中合州者佳元和郡縣志開元合州貢牡丹皮一斤元和貢牡丹皮昌運按縣中近無牡丹或名園或古剎間有一二本亦販花傭所爲也吾鄉易姓遭清同治庚午水災移居汪家巖於某古剎得牡丹一本席地虬枝近三尺花時重瓣紫紅如樓臺常十餘朵惜易子太俗少讀書無賞花者縣中學士山湖北候補道秦嘉澤由鄂回籍治園沼嘗見四人抬牡丹一本近五尺

後不數年嘉澤死園沼悉廢不可問惟東山李某宅在古佛殿後牡丹十餘本高數尺年年開重瓣李先人買某氏微業舊有牡丹明代遺物先人所植亦無能言者李幼時學賈重慶稍長走江西貨瓷恆不在家婦女鋤給外人輒不活堦下見餘數本花時亦與吾鄉從同外人無復過問餘則花販賣花爲業正月舊枝四五寸枝頭綴花苞隱隱有一朵有兩朵栽蒔盆中三月葉怒發其苞有花無花不計然綠葉扶持別有一番嬌娜可人也有花則誇其眼福至明年萎與不萎亦不與計成都花市牡丹較盛然亦無三尺者重慶園亭或公館門第多花販預訂花時挑來栽蒔盆中花卸挑去仍栽舊處時栽時移無夙根可指舊聞京都崇效寺牡丹甚麗爲天下冠意數百年靈秀所鍾另有一種天然國色庚戌入都至崇效寺花時已過如秋後荷花殘枝敗葉不可卒睹至洛陽風馳雨驟車不停軌辜負花事矣是年走蘭州臨行花販賣牡丹二本高尺有五爲狂喜蒔花盆而去一路風餐雨宿至隴界大雪滿天風蕭蕭路漫漫無復見人間生氣竊嘆天之塹南北正有此也抵省時冰橋結成黃河如輿梁然奇寒一至於此春至花時無可觀者至五月

忽填街塞巷喚賣花聲細觀之賣折枝牡丹也買焉以爲奇異徐而觀滿城皆有牡丹或插瓶或餐食如蘇東坡所謂牡丹豆腐殊雅致閱日同鄉約赴五泉賞牡丹從之蘭州名勝地固多寬敞多栽牡丹而牡丹成林諸友坐談牡丹林下或紅或白其高常八九尺丈餘不等不知蘭州牡丹何多也後歸抵家見盆中牡丹舊枝漸不如前亦不著花回憶在蘭州卓兒有信曰家內牡丹盛開鸚鵡能言矣今鸚鵡猶是所謂牡丹乃劣敗至此嘻豈地運爲之轉歟繼而思之中國藝術失法各國精益求精遂以誇耀中國此我輩之羞也牡丹爲我合佳品否何失法誠得其人如東嶽廟僧揆一精於年景花法凡土性宜如何培植宜如何灌溉宜如何霜雪如何避枝柯如何養何以轉弱而健北地苦寒此花何以隆隆稱盛皆當研究焉僅曰以棉團裹花枝避嚴冬霜雪陋矣蘭爲王者香葉蓬蓬由根而出根多肉有花本如小果而尖葉由此發生如茅草或如箭挺立花時抽莖正月開花者葉狹短如韭花小常一朵謂之春蘭開在春前三朵爲大春蘭葉稍長大春初開香皆清貴六月開花者葉寬長花數朵謂之夏蕙又有四七蘭自四月至七月終了

似蘭斯馨此蜂之所以采獻於王也有素心蘭分春夏二種香在諸蘭品上凡蘭有花心小瓣皆如篆書心字心字作朱色點花心此獨純白故曰素心惟是生植維艱如名士美人恒不世出昌運園中植此原有五箭今十稔五箭如故花厪三次所謂費盡辛勤不久看也洪晦翁有素心蘭詩見文在有魚子蘭原名草珠勁草叢生蔓引葉圓花淡黃如魚子酷似蘭馨花葉均不似蘭株蘭樹本根與蘭同香並魚子弔蘭花植簷邊樹杈得土斯活禪蘭葉大而長花亦繁特不香耳金邊蘭無花無香品斯下矣

蓮花水產也三月茁芽出水有葉卷而漸舒初如錢漸如蓋森森然六月出梗而花如毬所謂菡萏也有紅有白各一色天然可遠觀不可褻視花而實有數孔蓮房也孔中有粒蓮子也經秋而萎又有玩景所謂子午蓮者於子午二時饒有別致

有千瓣單瓣有心無心有子無子之分其色有黃白紅紫閒色淺深之別其味有甘苦辛之辨多至數十種因形製名不勝錄其特別者花深藍色上帶粉絲瓣大小相對儼似僧鞋曰僧鞋菊別有莖高數尺葉細長尖銳花形似菊有色無香分白黃紅數種折而供之可耐數月之久花老子熟收之作種其種來自外洋故呼洋菊又一種花形畧似洋菊而瓣較稀色金黃不耐久其種亦自外來名西番菊

梅冬季開花不畏霜雪先花後葉其花有紅白綠萼千葉單葉之分皆六出其香甚清別有本非梅類花與梅同香又近似色如蜜蠟者曰蠟梅約分二種開時含口而香濃者曰磬口花瓣尖長中有絳色蕊而香淡者曰雞爪皆先花後葉葉較紅白梅葉而大

芍藥冬季生芽至春乃長三月開花色粉紅種類甚多根有赤白二色可入藥用廣安農田多種之以供藥品合州則僅種花園中資玩賞茉莉其性畏寒冬季宜護之初夏開小白花重瓣無蕊秋暮乃止不結實香甚濃

玫瑰莖有刺葉如月季而多鋸齒花色紅紫香甚濃今滬上人采漬于糖以作醬爲餐館拌麵包上品宜問歲迤栽俗謂離娘藤

薔薇本多刺蔓生籬落閒花有純紅粉紅二色多重瓣香氣近於玫瑰

別有莖葉俱近似薔薇花較小色紅而朵多者名七姊妹

月月開原名月季莖青刺硬其葉小於薔薇花有淺紅深紅二種逐月開放不結子俗呼月月紅

紫荊樹彎條柔花繁色紫子圓如小珠春二月開一名滿條紅

紫薇花色紫紅圍枝樹皮滑似無皮人驟搔之則顫俗呼怕癢樹

海棠花瓣四作凹形色粉紅或純紅枝細而勁者名鐵腳海棠別有一種於枝頭垂絲吐花名垂絲海棠皆樹本又草本葉大背多紅絲成紋花四出嬌冶柔媚性喜陰濕見日卽瘁爲秋季特色名秋海棠

夾竹桃叢生枝柔葉狹長而尖花粉紅色不結實花開最久自夏初起秋暮乃止俗誤謂之碧桃

木槿可栽可插其木如李葉尖無榫齒花或紅或白朝開暮落白者供食尤佳五月開花故禮云仲夏之月木槿榮

木芙蓉幹叢生高者丈許葉大如桐而有五尖及七尖者秋季開花不結實初開白色次日稍紅又次日則深紅先後相間如數色採葉曬乾碾成末可縮瘡生用亦可

雞冠花三月生苗高者四五尺矮者數寸六七月稍閒開花有紅白二色其穗扁卷而平如雄雞冠狀故名子黑細而光滑似青箱子

秋葵春初種子或宿根亦自生葉似絲瓜葉有岐又過小滿後長莖高五六尺花有深紅淺紫色白色單葉千葉之異昔人謂其疏莖密葉翠萼豔花金粉檀心頗善狀之又一種名向日葵常傾葉向日不令照其根田家多種之子甚多可煎食

指甲花名鳳仙花二月下子苗高二三尺莖色或紅或白其大如指而柔脆葉長尖如柳葉而有鋸齒榫間開花有紅與白及雜色亦自變易狀如飛禽自夏初至秋盡開謝相續結實纍然如小毛桃生青熟黃觸之卽裂皮卷如拳子似蘿蔔子名急性子可催生

玉簪二月生苗高尺許柔莖其葉大如掌團而有尖五六月抽莖莖上有細葉中出花朵十數長二三寸本小末大未開時如白玉搔頭形微綻四出中吐黃蕊頗香不結子

水仙生下濕處根如蒜而長外有紫皮裹之冬月生葉如韭春初抽莖如葱而厚莖頭開花數朵狀如酒杯五尖上承黃心宛然盞樣香清幽

俗呼金盞銀臺人多以盆養之不令沾泥黃山谷水仙詩云凌波仙子不侵塵蓋指此也一種千葉者花皺下輕黃而上淡白不作盞狀其香亦遜

瑞香枝幹婆娑柔條厚葉四時不彫冬春之交開花成簇長三四寸如丁香狀有黃白紫三色

辛夷初出枝頭苞長半寸而尖銳儼如筆頭重重有青黃耳毛順鋪長半分許及開則似蓮花而小如盞內白外紅甚香亦有白色者人呼爲玉蘭花開後始發葉又名木筆花卽木蘭也

夜合原名合歡花葉似皂角葉而細五月發花紅白色上有絲茸枝甚柔弱其葉至暮卽合

繡毬亦名粉團花葉有鋸齒莖粗如筋而柔花千葉成簇圓如毬初春後自由白轉爲紅藍色其本分草木二種木本者莖長而葉較稀

梔子約有三種單葉小花者結子多千葉大花者不結子均夏日開色白香烈別有高不盈尺宜盆玩者亦夏花白而六出葉色尤濃綠俗呼海梔子

桂花亦名木樨分黃丹二色花四瓣細而繁多聚一處蒂有鬚葉厚硬光滑高者二三丈花時香聞數里別有四季開者曰四季桂又有花形如卍字者曰卍字桂流寓洪悔翁詩曰龍遊老樹放花時金粟繽紛卍字奇高嶺露溥香近遠若人聞得若人知蓋在龍遊寺咏也

山茶葉有厚稜花分紅白或白瓣紅絲紅瓣金邊重臺疊蓋接枝也嚴冬雋品爲花爲樹均能耐久龍潭漕王氏有十寶珠一樹十色

剪春羅二月生苗高尺許柔莖爲對生綠葉所抱八夏開花深紅色形大如錢凡六出週圍如剪成可愛

陽雀花杜鵑鳴時卽開葉開有小刺花絕肖蠶豆花色黃一葉一花金光成串味甘美可食

晚香玉一莖直上葉長一二尺而狹莖端開花數朵似玉簪花之未開者色白而香清開於夏暮

六月雪葉小而枝柔可編作屏可編作籬夏月開花色白如雪故名花形亦小如雪米

映山紅卽紅杜鵑花葉面有微毛花紅而豔別有色白者名白杜鵑花

其枝葉亦相同

滴滴金一名夏菊一名艾菊一名旋覆花一名疊羅黃莖青而香葉青而長尖而無柅高僅二三尺花色金黃千瓣最細凡二三層明黃色心乃深黃中有一點微綠者小如錢亦有稍大者所產之地不同也自六月至八月苗初生自陳根出則徧地生苗由花稍頭露滴入土卽生根故名滴滴金嘗斲地驗其根果無聯屬

夾竹桃花五瓣長筒微尖淡紅嬌艷類桃花葉狹長類竹故名夾竹桃自春及秋逐旋繼開

錦帶花益部方物記蜀山處處有長葉柔纖花萼間側如藻帶然因象作名花開形似飛鳥故里人亦號鬢邊嬌贊曰苒苒其條若不自持綠葉丹英蔓衍紛垂杜詩注錦帶花一名海花一名文官花有如錦遂名錦帶條如郁李春來方開紅白二色

美人蕉花出瓣中極繁盛紅如火炬謂之紅蕉經月不壞大是佳卉婦女愛惜之

仙人掌大者高七八尺似假山形如手掌花園中玩景采根去粗皮可

合川縣志卷十三 土物

二十二

入藥田居蠶室錄葉厚如掌多刺相接成枝花名玉英色紅黃實似小瓜可食

仙鵝蛋形十二瓣綠色質近仙人掌瓣端抽莖發花夏秋供賞周圍多芒刺因多瓣統合渾圓如蛋故名

金邊玉葉長六七寸狹而厚潤色青邊際黃如金因以得名有短刺無莖亦無花亦花園中玩景也

瓦蓮花生瓦上或石山上小不盈指常四瓣如瓜子尖圓根微鬚沾土卽活亦花園玩景

闌天竹常綠色灌木也花小瓣白色亦有紅色者夢溪筆談今人謂之南天竹南人多植於庭檻之間莖如朔藿有節高三四尺葉微似棟而小至秋則實赤如丹

漢宮秋葉綠圓似莧與莧同時生八夏而高濃綠可人初秋秀葉新出鮮紅著頂臨風孌孌遙望如花又一種新葉嫩出紅黃相間人呼爲十樣景皆無花與花同一名老來紅又名鴈來紅漢宮秋則其黃者也見面羞葉如皂莢細碎對生嫩綠色其梗可五六寸花園無人時分合

自如人見之或以手探之兩葉復合如羞見人也

雁來紅俗名老來紅葉似鳳仙葉而長開小花雜葉間其葉嫩時色青黃至老而紅甚豔又一種葉色由淺黃而深黃者俗名老來黃

滾水紅苗高數寸葉細其花如夏枯草花而小色紅以沸水浸之花不薦而色更豔採而藏之久不變色儼如造作者

荷包花葉大而深綠於枝頭引鬚吐花花中空形如荷包而下垂色朱紅無香氣

夜來香莖蔓生葉尖圓而稀花四瓣作十字形色微青香味芳甘夜來尤甚其花可食

金線蝴蝶花深黃色蕊中有鬚其瓣似蝴蝶形故名

銀邊蝴蝶花有深紅粉紅二種邊有鋸齒色白花面有茸形如蝴蝶亦因以名

棋盤花莖軟長而矮葉圓大花紅如杯美麗可賞其白色者稍遜

年景花有紅白二種益部談資長樂枝葉皆如虎耳草秋後叢生盆盎閒開紫色小白花冬末轉盛鮮麗可愛獻歲以此爲餽名曰時花卽蜀

合川縣志卷十三 土物

二十三

人所呼年景花也以應新年之景故云蘇頌長樂花賦序云蜀太守庭際有紫豐草秋中始繁英露洗冬早尙直本霜封蕪雜大同於眾卉盛衰小異於羣物余訝而未識吏或告余此長虞所賦蜀長樂花也故心暗賞焉因口授書吏遂墨而成作恨不見古人所爲得髣髴其旨爾賦曰夫長者以短長之形度其長者一作則至美夫樂者以哀樂之類同其樂者一作則至喜長也樂也吾安得而閒之嘉纖植之並用偉令名兮在

茲徒見其豐族莽蓴高標璀璨莖丹外而縞中葉縹分以紅貫綴綠穎之重疊索紫蕤之爛漫迫而象之君子其常或微或彰聳危冠兮纓若綬默退靜其何望遠以意之佳人欲翔炫炫煌煌重羅綺兮撲瑤翠蹇來思而未嘗匪以幽兮自直匪以直兮自藏匪以晚兮自耀匪以耀兮自強文濁露之均灑庇清舒之汎光本無嫌於散地甘有寓於殊方然則太液初滿上林新霽丰茸灼爍萬品千計搖瑞色而函芝雜奇葩而轉蕙孰與夫玉堂金闕一作閣之徧一作偏賞白日青雲一作春之特麗歲不與兮時向闌風蕭蕭兮夜漫漫賓遠鴻於沙塞叫離鶴於江于君獨不見三月華矣盡林閒之槁木千霜殞矣赤庭下之枯蘭懿此豐度凌於

種時令在穀雨後立夏前太早則地氣未和種爛不長一見涼風即敗太晚則耽延時日開花既遲見霜易萎灌溉棉樹種後或十日或十五日即發萌芽如有雨無庸灌溉若未得雨須以水糞灌之不必太多潤澤即可糞壅下糞法在耕之前將糞撒入地中與土和勻再用耙盪下復用勞條勞細至糞之多寡惟洋種宜多用糞打頭科莖一尺高即可打頭若打頭太晚或不打頭即徒長高而不放又下截無枝葉結桃必少此中國舊法如此今西人謂一打頭則稽之津液上攻若不到頭必旁攻歧叉桃子易落中西之法不同總須試驗乃決摘花棉種後四閱月而摘花不可太早俟桃熟苞開隨即下手如此則易摘易軋凡摘花可分三次第一次摘花後過半月摘第二次再過半月摘第三次高曠之地作工人少收成或遲一二月然於棉無礙其第二次所摘棉朵宜揀出最佳者以爲種第一次第三次所收之棉不宜作種也收成西國尋常棉花每科結百桃多者百五十桃亦有多至二百者每畝可出二百七十觔去子得淨棉九十觔中國土棉質粗而絲短不如西棉之質軟絲長且收穫亦不如西人之豐往歲有人在山東試種洋種桃大

如雞卵每科結數十枚亦有過百者總之西人種棉常法其大旨不出早栽疏種勤耕厚壅四端核之中國故書一一吻合 右草類

椿尖樹古名椿今以采尖名其木皮細肌實而色赤初春發嫩葉色紅香甘可茹無花無實其大者徑尺許可作櫛亦可作飯甑取其經宿飯不餒臭縣中蓄者爲椿芽計故鮮大者又有臭椿原名樗與椿相似惟皮粗肌虛而白共葉臭惡不可食其皮性澀入藥可止痢

松修聳多節皮粗厚如鱗形葉後彫四時常青二三月生花長四五寸結實狀如豬心疊成鱗次秋老則子長鱗裂又爲松塔其葉如鍼其木供梓人用

柏樹聳直葉不彫皮薄肌膩花細瑣實狀如小鈴如鈕子霜後四裂中有數子大如麥粒芬香可愛其木之大者堪作棟樑及棺槨之用小者可爲各種器物縣中炭礪甚多每用柏料以櫬孔道近時亦微而稀矣別有葉形扁而稍細者謂之側柏又有葉色蒼翠尖聳如筆者謂之筆柏如塔者謂之塔柏

杉木類松而徑直葉附枝生微扁如刺冬不彫大者徑尺小者數寸可

早寒假春期而不採一作雖秋令而不殘一作衡一作雨霰之旁薄任雲山

之險艱一作芳弗珍於霍靡節常慕於檀欒吾則知樹背之奚託惟傾

心之可安如後凋之是貴罔獨立其誰觀文學掾起而爲亂曰白露瀼瀼何草不黃紫花的的生君之堂彼不伐兮秋自翳時或珍兮君是惠彤庭赫兮朱草駢交屆軼兮有賓連伊榛莽而荒些兮君曷爲兮賦旃昌運按縣中年景花以東嶽爲盛春初爲之記曰由縣出北門沿街行至胡庶常坊里許卽東嶽窟古東臺也有僧揆一嘗雲遊晚歸結香火緣高行母論種蒔年景花時人喁喁稱善所謂老僧煮酒雖非英雄本色饒有雅人深致歲中每見此花或紅紫或白如素心多葉可愛中有莖紅白如花色花朵朵小於指頭常五瓣冬末春初花最耐久知爲東嶽廟絕技寺中每三月香火極盛縣中無男女無大小載酒作盡日遊然非花時或烈日高張長者車停遊人避暑率興而行均無與論花事也去年六月主辦移志局於寺旣入局隨喜諸佛殿與傾談殊落落因與爲方外交暇閒游見殿前樂樓下兩行列花盆各十徑五寸高二寸許滿貯紅石如數點殘星點綴雲霄問之揆一曰蜀中長樂花唐人稱

合川縣志卷十三 土物

二十四

之近少佳者老僧徧歷諸山惟此寺土性適宜地高敞且多閒階是以碌碌於此竊謂藐茲小草何託地之尊乃爾凌晨小沙彌分地灑掃積地灰樂樓下不糞除兩廊挂篷時或移豎樓階雜亂不治晚執花噓壺團轉下如散絲密雨晴或間日雨則閒日有差其地常浸濕不可解一日揆一顧而喜曰茁芽矣幸不負老僧辛苦蓋花結子時細小不辨收揆爲艱年中擇最佳一派開花極繁三月花卸子落移花盆藏暗室五月芒種移就當風處卽樂樓下喜風日色雨氣忌之故宜挂篷時罩時去避晴雨也地宜潤低下潮濕忌之故取高朗水有所出樂樓下層梯十餘級甚得也面土必疏離使纖子易入腹土必柔細子入土使易著根茁苗收種細辨土宜皆確有試驗茁苗後隨時培植去其敗者扶其佳者亦在運用一心而已細審盆中隱約可辨自是灌溉遮蔽無已日矣七月葉小於錢如虎耳草其背面有紋極嫩著手卽脆斷有僧篩樓下地灰去其粗糲置牆外肩花藍挑花盆大小形勻圓色深淺從同司花僧取花盆盛灰滿三匝執竹剷剷一苗就一隅栽之五苗一盆有僧移盆列樂樓下盆十一行約四十行按日行所事事漸長漸滿盆八

作棺槨造水器

欒一名栝櫚高四五尺樹端數葉大如扇四散岐裂其莖三稜四時不彫其幹正直無枝有皮裹之每長一層卽爲一節其皮有絲毛錯縱如織剝取縷解其作用甚廣

榆春初生莢形狀如錢而小色白成串俗呼爲搖錢樹

槐葉細而青綠四月開黃花七月結實其花未開時狀如米粒炒過煮水染黃色甚鮮其實作連珠中有黑子謂之槐角可入藥

桐分數種其常見者一爲荏桐亦名油桐月令三月桐始華花後結實其實圓大可以榨油卽桐油凡山土多有之老鴉溪尤多一梧桐樹似桐而皮青不皺其木無節直生理細葉似桐而稍小光滑有尖其花細蕊其莢長三寸許五片合成老則裂開子如胡椒大多者五六少或二三晚春生葉早秋卽彫一種皮白不結子者其木可爲樂器

麻柳發生最早濃綠色葉有線如梗兩邊皆碎葉旁生長尺許三月開花結實如人字有皮有核人字接連其梗亦長尺許月餘如落去其葉春發夏茂秋凋其質生軟乾堅生長頗速可作籩可解板爲各器縣屬

種植爲多

山麻柳樹亦同麻柳遠而望之其色尤濃綠而黯也樹亦稍直惟山中

有之木工作小器用之尤有力如燈籠舖及小箱匣皆用此柳縱橫倒順插之皆生春初發嫩條開黃蕊花至春晚葉長成後花中結細黑子蕊落而絮出如白絨多生水邊

構樹原名穀葉大如岐而有毛可覆鼓其漿含有黏性可取以代膠紅豆樹高數尺或丈餘其木質堅細沉重色微紅有花紋可造几案書櫥轎竿及雕刻楹聯匾額其子名相思子唐人所謂此物最相思也皂角樹原名皂莢幹多高大葉如槐葉瘦長而尖枝間多刺夏開細黃花結實有二種一種短而肥厚脂多黏性一種長而瘦薄枯燥不黏肥者熬膏可以去油垢瘦者性亦畧同其刺可入藥其木作菜凳尤佳椽子樹刺如鐵釘皮粗葉乾燥而滑結子豆大木理紅色曰紅椽其皮黑而葉大木理白色曰白椽其皮白而葉尖圓木質堅硬異常可以制挺及作春杵鋤柄之用

黃葛樹大者合抱葉似桂而大蔭庇數畝幹則擁腫根皆蟠踞石土如

月葉如錢者復如杯揆一顧之欣欣然篩灰僧儘所有篩之挑籃僧肩花盆齊出司花僧裝花盆灰使滿仍匝緊一苗一盆熟視令無偏倚始罷然後就階列或兩苗一盆合栽盆心亦審視無訛兩苗者或紅白各一或全色其不傷者悉芟除計千盆有奇兩廊各階舉花盆矣時而沿階侵潤時而挂篷分張課工密哉十月盛者盈尺淺者七八寸葉高低一色深翠柄及莖紅白各分莖挺挺出向之篩灰者挑籃者各運紅石子土積樓下捶石土成粒如豆瓣堆樓下司花僧坐紅石側運花者陸續至司花僧輕勻密布盆中纍纍然次第施之無所損運花者復次第運去揆一指最佳者若干盆移植殿後某階爲明年收種計也指佳者若干盆置殿後某階爲隣封縣屬或某某購訂也指不常見者若干盆置某階爲交遊年節也指常見者若干盆置某某階給諸僧辛苦並作寒山燈火也滿院皆花鮮麗可愛花遲遲欲語無何移局歸揆一祖錢同人曰老僧花事忙諸君辛苦數月廟中花爭妍鬪靡若專爲花譜一增色也今諸君別去他日開時當遙寄爲諸君壽主任臨別謝以詩去予同去歲除歸家有年景花二一紅一白花最繁盛時並家中春蘭供

神座此花匝月不卸新年拜訪諸友皆有花僉曰揆一師盛意餽花且曰以供諸君筆潤請志之山僧藉有光矣因記之 右花類

壽星橘花色似柑惟葉稍尖細實長圓青黃色皮香可生食瓢味頗酸蜜煎之爲糖果上品清貢生朱虎臣有詩

柑子樹高丈許葉卵而長花五瓣色白冬初實熟形扁圓由青而黃而赤多液味先酸後甜佳果也此樹不接枝種子爲秧十年分栽靠筒則一年下樹可分栽然不若子秧耐久凡栽柑以丈遠爲窩每年用糞灌漑去劣枝去蠹蟲靠秧在十年外子秧在二十年外每株可二千紅也縣屬多柑園或見花或見子販水果者踵於門由是搭厰歷有厰規罔不守經冬成熟販運嘉陵各馬頭供陝甘等地口食不僅沿街呼賣無貴賤無少長無男女有同嗜焉橘餅爲年節一種禮物冰橘房尤多收儲至皮曰陳皮子曰橘子筋曰橘筋皆八藥而冰橘房之皮曰雲皮其價尤昂自來供禹州勝會又有四季柑樹與花葉俱似柑實小易熟年可數次壓扁蜜煎爲金錢橘又香柑亦柑類實小皮稍薄熟時色黃氣清美出滙沔鄉又廣柑皮較粗厚色黃味甘酸有同名柑而佛手柑者

亦稱佛指香櫞葉橢圓鋸齒甚細春開白花五瓣秋季實熟皮黃如柚形長上端分岐如手指清香襲人蜜煎可食

香柚果原名香櫞與佛手柑同類實形圓上端微尖皮厚色黃若橙氣香供蜜煎用清玩亦佳

橙子樹高丈餘葉似橘而大花白實經霜早熟較橘大數倍形圓色黃味酸一種皮緊而紋細色黃瓢赤多液味甘酸曰紅心橙一種瓢白多液而味極甜者曰甜橙又有一種給客橙出瀘州縣中亦間有之

青果原名橄欖一名諫果樹聳直而枝高葉長橢形春季開花實長寸許中段圓兩頭銳味先苦澇後甘美縣中間有之

梅子樹丈餘葉如杏子夏初結實生青熟黃亦如杏子多於青時折之可藥可羹可爲□梅

杏子其樹花葉均似梅子夏熟色黃味甘不酸其仁扁而尖可入藥其樹必小秧時靠以沙杏不靠不爲沙杏味酸甚

白果原名銀杏樹高數丈葉薄縱理如鴨掌有缺面綠背淡二月開花成簇青白色二更時始開隨卸落人罕見一枝結子數十經霜乃熟爛

合川縣志卷十三 土物

二十六

去肉取核爲果其核兩頭尖三稜爲雄二稜爲雌其仁嫩時綠色老則白黃須雌雄同種其樹相望乃結實

棗子色紅木赤心支有刺四月生小葉五月開小白花八月結實可入藥可蜜煎可浸酒古詩曰紅棗林繁喜歲豐又酸棗葉稍大開花結實狀與棗同味酸極不可食樹多紋不易長成染人用作踩滾染色有光又拐棗高數丈葉圓大如桑柘夏月開花枝頭結實如雞爪形長寸許紐曲作兩三岐嫩時青色經霜黃紅而紫味甘如蜜拐棗末結子去圓殼子如棗仁故名棗也治扼逆要藥

○森楷案拐棗古名□橘子與棗不同種宜另爲一條

櫻桃樹高數尺葉深綠有鋸齒花五瓣淡紅而豔實渾圓春夏間熟故稱百果之兄色紅肉嫩嬌豔欲滴味甘微酸而性熱人喜食之
石榴樹高丈餘葉形細長而尖花赤萼瓣深紅亦有白色者實成球狀赤色有斑熟則自裂子形如人齒色微紅而透明汁味甘美

枝圓原名龍眼樹爲喬木幹高一二丈葉爲羽狀常綠夏初開細白花至秋實熟圓如彈丸殼有細紋肉白味甘鮮

葡萄蔓莖柔條葉繁鬚捲依架附木而生其長可延數丈開黃色小花

如穗卸後結實纍纍圓如櫻桃色純綠及紅紫者最多亦有形如馬乳而色青者味尤甘美

水晶蒲桃形同蠟丸似桃而小花開一簇如鍼蕊長寸許七月熟色青黃中虛有核如彈丸搖之成聲肉鬆而甘重握卽碎

枇杷一名盧橘樹高丈餘葉橢圓而長花白五瓣實隔年先花至四月乃熟形圓色黃皮有細毛味甘酸劉淵林蜀都賦注枇杷冬華黃實本出蜀

林檎樹高丈許葉橢圓有鋸齒花五瓣色白有紅暈實形扁圓大如櫻桃青白色味甘酸蜀都賦其園則有林檎枇杷又一種形色相似惟實大寸許俗稱花紅一名沙果按洛陽草木記林檎之別有六花紅特一種又咸淳臨安志林檎土人謂之花紅可證

木瓜榦係灌木實形似瓜非瓜類也高六七尺葉爲長橢圓形至春先葉後花分紅白色頗美麗實亦長橢圓形色黃蒂間別有重蒂如乳狀香氣尙佳味澇而酸蜜煎鹽醃均可食

核桃原名胡桃栽者甚少葉爲奇數羽狀複葉夏初開花雄雌花俱成

穗狀下垂秋季結實熟後漚爛皮肉取核博物志謂張騫使西域所得故名

沙棠一名白棠一名羊嬭子榦與葉差類棠梨花黃實紅味如李無核其材可以爲舟呂氏春秋果之美者沙棠之實卽此

苧薺一名地栗植於水田一莖直上花穗聚於莖端根下生地下莖圓扁味甘秋後熟供食可軟銅質化蠱毒其大者名慈姑

菱角原名芰種陂塘中莖端出葉畧成三角形浮於水面夏月開小白花四瓣實有角二角曰菱四角曰芰色褐黑生熟皆可食

刺栗野生夏花秋實榦與果俱多芒刺味甘酸有消悶效並可煎汁爲膏亦或謂之茨梨

板栗原名栗樹高數尺葉形如箭鏃初夏開花實有苞生刺如蝟毛霜降後熟苞裂實墜外有硬殼紫黑色一苞內粒數不一其仁淡黃色味微甘木理堅緻可以製器

桃樹高丈許葉橢圓而長春季開花色或紅或白均豔麗實夏熟味甘酸分數種皆用小秧靠接不靠則爲毛桃子不適口白花者良

李樹亦高葉卵圓而長花色白五瓣實渾圓或紅或青或黃或灰白微赤色分數種味均由酸而甜

無花果樹小而軟弱葉扁圓根多鬚夏月不花成果秋季採之形圓細色青味苦可入藥

柿俗作柿誤樹高丈許葉卵形而尖花微黃實扁圓而紅徑二寸許八九月熟未熟時味澹熟則甘人多生食縣中出亦不多他處有去皮壓扁曬乾者謂之柿餅

紅子小木本實朱紅色纍纍如珊瑚珠可食遵義府志載戊己編云紅子木類山谷道旁多有之高二三尺叢生拳密根最堅深枝間刺如錐二三月開細白花結子圓扁有如大豆者有如細豆者大者味極甘細者苦澀子紅如火亦有黃色者八九月熟若至冬經霜雪其味尤佳嘗有句云黃茅傲雪稜偏利紅子經霜味更甜

落花生蔓生於土葉尖小花色黃落則實生實埋地下有莢有縐紋一子一管或三子一管莢有微根春分播種至夏季各物成熟是花榮榮然農家用篾簍碾平之使藤伏地八九月次第挖出性味香脆可炒食

合川縣志卷十三 土物

二十八

古竹枝詩云堆花燒酒下花生食品中最便易者可油可飼豬藤亦充薪沙土河土最宜城鄉均以此爲日消品

甘蔗莖似竹中實有節無枝長數尺色灰白葉狹長而尖聚於莖頂有紅白二種皮色紅者體大而稍矮利於生啖皮色白者可爲飴又可爲糖霜縣中舊日製糖甚多今不復種之者亦利生啖而已本草煉糖和乳爲石蜜卽此

梨樹高一二丈葉卵形而尖花單瓣色白實渾圓皮色分青黃斑褐數種味或酸澹或純甜或酸甜不一業梨園者覓山中野梨栽之凡三年四年如指大或稍大於正月雨水刈其本僅留一尺或二尺許就勢批一刀微分之或再分以常接梨之枝近尖五寸許刀斜削取嫩枝之皮與批處之皮適相和合大則四枝小則三枝兩枝外敷牛矢及黃土末又束以櫻束緊勿使風動其枝所謂移花接木也春時地氣上升上下一氣其枝可活他時結子某處某梨一一視所靠者縣中梨園近時如紗冠廠觀音壩牛頭山汪家巖荔枝堡長田坎梨樹不多可賣重賈比諸樹利溥且愈老愈佳尤爲果樹難得近尤靠接得法佳味日多其捕

蟲一法更臻美善用長竿丈許通竿末四五尺束以小籃上如盃下漸小束竿使固視蟲所在執竿承樹以搜捕梨蟲由籃而竿入竿內且不知其所止亦妙矣哉 右果類

葛藤葛蔓能庇本根最繁衍也春日蔓生長一二丈紫色葉似楸葉而小色青七月著花粉紫色似豌豆花不結實根形大如手臂紫白色五月採根以入土深者爲佳今多作粉與藕粉同

爬壁虎原名薜荔緣牆壁生自然爬貼葉深綠耐久不彫并開花結實古詩密雨斜侵薜荔牆卽此

荼蘼一名獨步春莖條軟柔葉如品字形緣架蔓生花分紅白二種以暮春開故名有開到荼蘼花事了之句俗名蜂釐花以浸酒色嬌碧凌霄花金黃色中有鬚絳色開時纍纍滿架其藤性喜上升故名

紫藤俗名朱藤細葉相對花紫蕊黃三四月間開花落結莢如蠶豆牽牛二月種子三月蔓生繚繞籬牆高者二三丈其葉青有三尖角七月生花微紅帶碧色似鼓子花而大八月結實外有白皮裹作球形每球內有子四五枚有三稜分黑白二種

合川縣志卷十三 土物

二十九

乳藤蔓如懸鈎到挂葉尖而長斷之有白汁如乳婦人產後以藤搗汁和米作粥食之乳漣自通

菟絲苗莖似黃絲無根株不能自起多附田中草蔓延而生無葉有花白色微紅結子如碎黍八九月採之俗呼無娘藤種豆者忌之

八月瓜一名野木瓜一名八月楂又名杵瓜蔓生其葉簇然光潤似黑豆而微小秋季結實味甜

卍字金銀藤與葉俱似忍冬卽金銀花惟花獨異每朵四瓣作卍字形有黃白二色香氣稍遜

鈎藤莖柔而長傍生細鬚如鈎葉青而尖根柔而長味苦辛春發秋枯醫家多采入藥

排風藤莖柔長葉尖圓青色根柔而細味皆辛苦二月多自生荒林及巖坎潤濕地方小兒常服外科亦多采入藥縣中皆有之

白茨藤條長而柔茨極多葉白而尖味酸辛二月莖發生新葉後漸暢茂多自生巖坎廟後外科常采之

牛馬藤柔而長葉青色圓大根巨二月長藤發生新葉四月開花色黃

白香悶五月結實扁黑惟蔓延樹上重疊如海市蜃樓生長極多

地瓜藤莖柔長多白汁葉尖小青色根長而軟二月葉由舊重生蔓延
虛巖野墳夏末結實扁小生青熟紅味極甘美人常自泥中掇而食
雞矢藤色紅柔長葉青尖圓根軟味甘微苦二月緣藤生葉老人常采
此葉和飯米磨麪煎軟餅謂補劑也 右藤類

慈竹卽子母竹又謂之義竹又謂之孝順竹性叢生根不外向六七月
茁筍節上稀下密爲多年生植物質圓虛中深根勁節性堅韌可爲各
種器種大小高低不一葉四時常青有並行脈批篋爲用甚廣近城園
林不離斧斤鮮有植者鄉間沿山種植造紙供用吳均慈竹生必內向
示不忘本宋子京根不他引是得慈名蓋栽必以筍生不離本外部有
節籜衣解時節多不正內部節有底中不平凡如是者皆慈竹類也
黃竹慈竹類質小而有力生卽黃色薄而直批篋最好凡瘠山多習此
筍爲紙料可供器用

硬頭黃慈竹類質厚極有力但不易老數年始可用榮昌縣所製扇骨
實此物也亦爲轎竿之用峽中多種此

琴絲竹慈竹類質黃而有青絲兩線在旁如琴絲然自首至尾天然成
文可備觀玩無他用

觀音竹慈竹類質厚節稀小者引蔓大者用以爲器

南慈竹長數丈圓尺有許質肥厚生軟乾堅大如南竹無多用草房用
作長領凡水口當風處多栽此以配屋基生筍甚巨正日食之不甚柔
嫩

箬竹慈竹類其葉疏遼故又謂之遼生平澤中葉面青背淡柔而韌新
舊相代四時常青男人取以爲笠女人取以襯鞋底船家造篷用之
叢竹慈竹類形似水竹簇然叢生枝幹及葉皆細密足供玩賞其宛肖
鳳尾者尤佳

桃竹慈竹類質小色黃批篋柔軟人家多種爲園籬可筍可簞元和郡
縣志合州貢桃竹筍又載銅梁山在縣南九里蜀都賦曰外負銅梁於
宕渠是也山出銅及桃竹通志重慶屬合州貢桃竹筍保甯屬巴州方
言謂簞爲笙桃笙乃桃竹簞也重慶府志本草蜀中出桃枝竹皮滑而
黃犀紋瘦骨四寸有節可以爲席蜀記渝州出桃竹簞爲時所重而書

顧命云敷重篾席孔安國曰篾桃枝竹又爾雅云桃枝竹皮滑而黃可以爲席山海經曰蟠冢之山囂水之上多桃枝竹裴氏廣州記有桃竹魏志曰倭國有桃枝竹太平御覽引之又西京雜記所謂流黃竹也竹小而密人家多植以援籬或云慈竹卽是桃枝竹又名四季慈竹漳浦縣志嶧縣志並引之而遵義府志則引華陽國志江陽有桃枝竹蜀都賦靈壽桃枝劉淵注云桃枝竹屬可以爲杖揚雄蜀都賦叩節桃枝竹譜竹心中空惟此竹實如木杜子美桃枝竹杖微稍有異縣屬舊志如張如程失載竟不知桃枝爲何屬昌運今據漳浦縣志桃枝竹下復列桃竹云皮葉如并閩長可丈許杜詩云江心蟠生名桃竹去根削皮如紫玉浦人呼爲櫻竹蓋明明二物混一不可也且櫻竹只可爲杖爲簞固不可爲筴則亦無此小者斧而斲之表裏判然尤不可今核其實則以四寸爲節滑而黃小而密人家多植以爲籬援四季生筍爲斷然則桃筴其今之綿竹乎水邊山邊屋邊滋生不已所謂四寸而節滑而黃小而密人家多植以爲籬援四季生筍蓋無不合幼時見以此竹爲簞屢問竹工織簞宜然則今胡不以爲簞則銅梁縣志所載安居禁溪水

竹爲之則柔滑花紋畢見安居織席爲盛遠近富素家無不備置廣安岳池則又羣以慈竹爲席色澤雖不如安居水竹賈廉工省其物能銷宜漢一帶桃枝竹不如水竹之柔滑多紋亦不如慈竹之工省縣屬廣出慈竹水竹故桃枝不爲簞也卽問之保甯亦不爲簞也曩竊疑筴之一說筴或著字說文筴飯鼓或作筴禮記曲禮羹之有莢者用桼注云今人或謂筴爲桼筴卽筴也廣韻亦謂之筴今俗呼爲筴筴筴也吳俗行舟諱言筴故謂著爲篾兒見陸容菽園雜記是筴之本乎竹也第徧觀縣中業筴家率用南竹長數丈圍尺許其尖節近尺或尺有奇頭質厚供籬齒炭礪諸用及大船牽籐尖則爲筴綿竹之小豈任此乃讀武風子傳而釋然矣虞初新志武風子者滇南之武定州人也名恬先世以軍功官於衛恬以胄子少學書已棄勿學好閒不謀營利嗜酒日謀醉簞瓢屢空晏如也凡游藝雜技過目卽知之滇多產細竹堅實可爲筴武生以火烙其上因爲利生顧未嘗售也頗自珍重一筴成輒把玩不釋保護如頭目或醉後痛哭悉焚之醒後悔悔而復作然斬不輕與人好事者每矚其謀醉時置酒招之造必盡懽酒酣以火與筴雜陳於

前而不言生攘臂起頃刻完數十籌揮手不顧也或於酒中以箸相屬則怒拂衣出終身不與之見或遇貧士及釋道者流告以困窮輒忻然爲之雖累日不倦於是滇士夫或相餽送皆以武生箸爲重王公大人游於滇不得武生箸卽不光嗚呼武生非以細竹爲箸也歟是以斷斷名綿竹爲桃竹

鳳尾竹慈竹類極細小枝葉全體似慈竹好園事者多栽假山山石亦盆景中雅事也

斑竹生不離本地下生馬鞭鞭有節節生筍出土解籜外部節文甚正內部節平底無凹凸狀皆斑竹類也竹色青無斑大可盈握節有雙紋卽筍竹山海經曰筍竹大者圍尺二寸長四丈縣中無此巨者圍尺可爲鹽井用賈甚昂不易得多七八寸或四五寸大者供鹽井用小者轎竿船篙備竹工用惟不利作篾席作烝籠

南斑竹斑竹類色態似斑竹而體較大其質可作籩油提等用

水竹斑竹類宜植水邊大者徑一二寸質光膩而節稀爲編涼席大宗詳工業掌錄

苦竹斑竹類其質脆用之者少惟作香燭心佳筍味苦燒之尙美齊民要術有青白紫黃四色謝靈運曰賦四苦齊味

黑竹卽紫竹斑竹類也初生色青老則黑如漆而有光其性能避瘋狗故鄉里小兒多攜之

金竹斑竹類竹色如金葉亦微黃形同杯大可作竹器

白甲竹斑竹類如水竹有筋力但多白暈可爲紙料

茨竹斑竹類色黑節有刺周圍發生如顆粒生筍遲八月始出土多嫩食之佳者餘則節如竹而虛心不如竹者櫟竹葉如櫟葉而小節甚密而心實色紫黑皮有絲毛可爲玩品心虛如竹而葉不如竹者蘆竹長丈許易生中空皮薄色白葉如箬竹而大筍苦不可食 右竹類

花椒隨在有之其木高五六尺小有鍼刺葉尖而滑四月結子縣屬四月食新麥采食無園林故無紅而熟者本草綱目李氏蜀椒子光黑如人之瞳人故謂之椒目羣芳譜椒一名花椒川椒肉厚皮皺粒小子黑外紅裏白入藥以此爲良

茱萸本名藪木高丈餘皮青綠色葉似椿而潤厚紫色芒種開細小白

花結實似椒子成餅嫩時微黃八月則深紫色味芳烈重九插茱萸今人不能待也縣屬多有之間習成林最易生者楊雄蜀都賦藪艾同字贊曰綠實若萸味辛香苾投粒羹臞椒桂之匹本草綱目李時珍曰食茱萸一名藪卽欖子蜀人呼爲艾子

使君子其莖柔軟繞樹而上其葉如兩指頭長二寸三月生花五瓣淡紅色久乃深紅六七月結子長寸許似梔子有五稜殼青黑色內有黃裏白仁出臨渡河兩岸人家多麻柳樹田邊土邊皆是使君子籐如葛之坵旣上而復下垂春夏之交茁秀敷花臨風裊裊致有趣也花而實而熟蓋特產人多販售外省李調元南中草木狀有使君子詠云丰角稜稜張一軍還看赤壁火如焚小兒作崇渾閒事畢竟收功讓使君文在調元所刻函海中又云欲得小完喜多食使君子亦載集中

巴豆惡木也發生時牛羊均不食至老而枯亦不能爲炊誤以爲炊釜中之食皆殺人木高丈餘葉如櫻桃葉而厚大四月舊葉落盡新葉齊生發花成穗微黃色五六月結實作房其實甚繁七月熟而黃漸漸自落乃收之一房有二瓣多空子餘一瓣一子或三子子有殼用之去殼

合川縣志卷十三 土物

三十三

荒山多成園林如峽中如華銀各山地雖不甚繁然較他邑爲盛邑人每秋連殼貯之以一石二斗貯一簍附巨船載入廣淮等處發售

藿香二月生苗方莖有節葉似桑而微小穗而花花紅色嫩時可泡茶清暑有清香六七月採之曝乾可入藥

薄荷古名菝葜

見食性本草

原產蘇州今縣屬處處有之莖葉似荏而尖長

經冬根不死夏秋採莖葉曝乾可以代茶亦爲治風寒要藥故人家多蒔之

紫蘇二三月下種或宿子在地自生其莖方其葉圓微有尖四圍有鋸齒肥土面背皆紫瘠土面青背紫嫩時採葉和蔬茹之甚香又可雜入罈中作醃菜之媒醃水不壞五六月連根收採時以火烘其根陰乾則經久葉不落葉莖與子均可入藥

艾二月宿根生苗成叢其莖直常白色高四五尺其葉四布狀如蒿分爲五尖極上復有小尖面青背白有茸而柔厚五月五日連莖刈去曝乾收葉陳久而後用故俗名陳艾

菖蒲生水石之間野生品葉中心有脊狀如劍長一二尺許花青色無

實根盤屈有節狀如馬鞭五月五日採之入藥出建昌者良

老虎薑名黃精根似薑又名野生薑今人則羣呼爲老虎薑三月生苗高一二尺葉如竹葉而短兩兩相對莖梗柔脆根如嫩薑而黃色採根蒸過曝乾可以入藥亦或有蜜煎者

淡竹葉春生苗細莖綠葉儼如竹其根一窠數十鬚鬚上結子如麥門冬狀但較硬爾亦曰淡竹冬

常山生山谷間莖圓有節高者三四尺葉似茗而狹長兩兩相當二月開白花青萼五月結實青圓三子爲房其葉曝乾色青白堪用若陰乾便黑爛矣爲治瘡要藥

半夏二月生苗一莖莖端三葉淺綠色頗似竹葉八月採根以灰水浸二日湯洗曝乾俗名三步跳

知母葉如韭四月開青花如韭花八月採根須揀肥潤裏白者去毛用之又有土知母別一種

狗脊一種根黑色如狗脊骨一種有金黃毛如狗形皆可入藥其莖細而柔花兩兩對生比貫眾葉有齒背面皆光其根大如指拇有硬黑鬚簇之外傳黃毛如茸俗金毛獅子

合川縣志卷十三 土物

三十四

貫眾多生山陰近水處數莖叢生一根數莖莖大如筍其涎滑其葉兩兩對生如狗脊葉而無鋸齒青黃色面深背淺其根曲而有尖嘴如鳥狀黑鬚叢簇亦似狗脊根

香附子名莎草四月刈麥後郊原叢生綠色可人李時珍云莎葉如老韭而硬光澤有劍脊稜五月中抽一莖三稜中空莖端復出數葉開青花成穗如黍中有細子其根有鬚鬚下結子一二枚轉相延生子上有細黑毛大者如羊棗而兩頭大採後燎去毛曝乾爲婦科要藥木賊多生近水處苗長近尺叢生無花無實□寸有節色青凌冬不凋隱花植物也縣屬多有之可用□磨拭木材及骨角等物

土升麻春生苗高三尺許葉似麻青色四五月著花似粟穗白色六月以後結實黑色根如蒿根紫黑色多鬚其性上升入藥多用根按升麻產雲南漢書益州郡收靡縣下可證收靡今屬雲南蜀產以土名別白鮮皮苗高尺餘莖青葉稍白如槐四月開花淡紫色似小蜀葵花根似小蔓菁皮黃白而心實採其皮可以治風瘡疥癬

牛膝秋閒收子至春種之其苗方莖暴節葉皆對生似莧葉而長且尖秋月開花結子九月末取根水浸兩宿去皮曝乾能引諸藥下行有紅白二種根亦然

三七其葉左三右四故名三七其性能合金瘡如漆黏物故亦名山漆春生苗夏高三四尺葉似菊艾而勁厚有歧尖莖有赤稜夏秋開黃花蕊如金絲盤紐可愛根似白芨味微甘而苦似人參之味治金瘡折傷出血甚效故一名金不換

蓖麻子莖赤多節如蔗中空其葉大如瓠葉葉凡五尖夏秋閒榼裏抽花穗纒纒黃色每枝結實數十顆上有刺攢簇如蝟毛而軟凡三四子合成一顆枯時劈開狀如巴豆殼內有子大如豆殼上有斑點殼中有仁仁取油其油最多可調印色可入藥藥室熬鍊膏藥以此又可催生孕婦臨產以蓖麻葉兩張令脚踏之搗蓖麻仁貼命門產後卽去慎之青葙子生田野閒嫩苗似莧可食長則高四五尺苗葉花實與雞冠花無別但雞冠花穗或有大而扁或團者此則梢閒出花穗尖長四五寸狀如兔尾水紅色亦有黃白色者市中多以雞冠花子及莧菜子雜之

最難分辨

牛蒡子一名大力子其葉大如芋葉而長實似葡萄核而褐色外殼似栗而小如指頭多刺秋後收子入藥野生

蒼耳子本名藁耳其葉青白似胡荽白花細莖蔓生可煮爲茹滑而少味四月結子多刺野生

地榆宿根三月內生苗初生布地獨莖直上高三四尺對分出葉葉似榆葉而稍狹長似鋸齒狀青色七月開花如椹子紫黑色其根外黑裏紅似柳根

淫羊藿生大山中一根數莖莖粗如線高一二尺一莖二榼一榼三葉葉長二三寸如杏葉面光背淡甚薄而細齒有微刺野生

見腫消春生苗葉莖紫色高一二尺葉似桑而光擣之可消癰腫野生類也

括樓三四月生苗引藤蔓葉如甜瓜葉而窄作叉有細毛七月花似壺蘆花淺黃色結實在花下大如拳生青九月熟赤黃色其形有正圓者有銳而長者元和郡縣志合州貢白藥子卽此物天花粉其根也

天門冬春生藤蔓大如釵股高至丈餘葉如茴香極尖細而疏滑有逆刺夏生細白花亦有黃色及紫色者秋結黑子其根白或黃紫色大如手指實圓而長二三寸可入藥亦可蜜煎天門本作天薺

枳實枳殼一也小則其性酷而速大則其性淡而緩榦小於橘高五六尺葉如橙多刺春開白花至秋成實未熟而採者爲枳實已熟而採者爲枳殼

百合三月生苗高二三尺榦直如箭五月開紅白花如石榴嘴而大根如蒜重疊生二三十瓣可作蔬食并可入藥磨粉縣中種者甚稀以隣縣白合粉有特產也

荆芥本草名假蘇野生今爲世用遂多栽蒔二月布子生苗方莖細葉淡綠色八月開小花作穗成房房如紫蘇房內有細子如葶藶子狀黃赤色連穗採收備用其初生時甚辛香人多以之代茶惟食無鱗魚後忌食之

何首烏春生苗蔓延竹木牆壁間土埤巖楞尤盛莖紫色葉葉相對苗蔓相交夏秋開黃白花結子有稜似蕎麥秋冬取根大者如拳視蔓之巨細卽知根之大小或挖無數根頭取圓者爲頭長者爲腹手足各取其似微削之以竹爲筋相爲男女陰陽備具莖卽髮又從而栽之栽數年挖出儼然人也不知者幾謂天地之巧有如是云

土茯苓生山箐中莖有細點其葉不相對狀類大竹葉而質厚滑其根大如雞卵連綴而生遠者離尺許近或數寸其肉軟可生啖有紅白二種入藥用白者良

骨碎補生石上及背陰處引根成條上有黃赤毛及短葉附之又抽大葉成枝葉面有青綠色有青黃點背青白色有赤紫點春生葉至冬乾黃無花實採根入藥

石斛叢生石上其根糾結甚繁乾則白軟其莖葉生皆青色乾則黃色開紅花節上自生根鬚將根折下用物盛挂簷前頻澆以水經年不死可入藥

威靈仙亦名鐵腳靈仙初生蔓莖如釵股七月內生花六出淺紫或碧白色根稠密多鬚九月採根用入藥

木通藤繞樹生大者徑二寸每節有二三枝汁白莖有細孔兩頭皆通

森楷案不
子木類寄
當與草同
伍下桑子
生苦棟寄
同

含一頭吹之則氣出彼頭

金銀花名忍冬附樹蔓生莖微紫色對節生葉葉有濇色三四月開花長寸許一蒂兩花花二瓣一大一小如半邊狀長蕊花初開者蕊瓣皆白色經二三日則色變黃新舊相參黃白相映故俗名金銀花氣甚芬芳四月採花陰乾藤葉不拘時採均可入藥花又可代茶

馬齒莧園野皆多柔莖布地細細對生有紅白二種可醃食味微酸六七月開細花結實尖小實中有細子人多採苗用

梔子葉如兔耳厚而深綠春榮秋瘁入夏開花大如酒卮白瓣黃蕊隨即結實或五稜或七稜如使君子惟殼內有子有瓢皆黃色可染可藥存貯久年不壞縣中荒山習成園林常有以此成家者

金櫻子生山谷間花最白膩其實大如指頭兩端銳其核細碎有白毛桑寄生諸樹多有寄生莖葉皆相似云是烏鳥食一物子糞落樹上感氣而生葉如橘而厚軟莖如槐而肥脆處處雖有須桑上者佳

苦楝子木高丈餘其長甚速葉密如槐而長三四月開花紅紫色氣甚芬烈實如彈丸生青熟黃冬月採之

合川縣志卷十三

土物

三十七

雷丸大小如栗狀如豬苓而圓皮黑肉白堅實無根無苗多生於竹林中本草云乃竹之餘氣所結

固脂訛稱也本草名補骨脂言其功也胡人呼爲婆固脂俗又訛呼破故紙氣味辛大溫無毒主治五勞七傷風虛冷骨髓傷敗腎冷精流及婦人血氣墮胎男子腰疼膝冷下濕逐諸冷痺頑止小便腹中冷興陽事明耳目治腎泄通命門煖丹田斂精神縣屬藥品以此爲巨李時珍本草又載白飛露方外奇方云破故紙屬火收斂神明能使心包之火與命門之火相通故元陽堅固骨髓充實濇以治脫也胡桃屬木潤燥養血血屬陰惡燥故油以潤之佐破故紙有木火相生之妙故語云破故紙無胡桃猶水母之無蝦也莖高三四尺葉小似薄荷花微紫色實如麻子扁圓而黑九月採縣屬金子沱一帶農家多種之渠河嘴下河岸平土亦多種也舊志載有補骨脂園在釣魚山下一偁故紙臺

白芷莖柔弱葉扁小五月開小白花結實自落根藏土中色白而脆氣味辛香遂甯多種之本縣亦有古名芳香

茴香葉細碎莖細長枝繁根小春種夏花至秋結實質白味香

澤蘭莖紫色葉短圓味辛苦而香秋開淡紅花清香可愛或佩帶之
白藥子卽栝樓根形長圓含粉質甚富曾充前代貢品詳見栝樓
雞蘇之葉色鮮紅圓大如雞冠莖大而條長根多細鬚性溫和味辛烈
宜植菜園肥土生長頗速

螫麻古名蓴葉尖圓而青方莖中空多細軟有茨能螫人其味苦辛近
根處始可拾三月緣根發生冬則結子凋殘小兒驚風多采以入藥惟
華銀山廣出鮮紅者全體一色尤矮小入藥尤佳

千里光葉青圓莖柔長根細多鬚性寒涼味酸辛外科用作洗藥春時
發生漸茂冬則枯野生多在巖礫潤濕之區各處皆有之惟臨江寺獨
多本工或采以熬糲油甚佳

五皮風葉細小而碎莖柔布地而生春時茁茁四月牽藤開極細黃花
五月結實自落性溫味辛可入藥此種惟生黃沙黑沙油沙各土餘則
不宜 右藥材類

烏孝鳥也反哺其母尤爲人所欽敬小而純黑有光彩此鳥初生母哺
六十日長則反哺六十日詩所稱弁彼鸞斯是也

合川縣志卷十三 土物

三十八

鴉不反哺其名自呼羽黑白項身類烏性樂空曠傳涎而孕春秋爽鳩
爲司寇卽此仲春化爲鳩

鵲知太歲所在與風所起故營巢開口必避之又謂之喜鵲陸賈曰乾
鵲噪而行人至是也爾雅翼謂七月七日鵲無故皆髡相傳是日河鼓
與織女會於漢東役鵲爲梁渡故毛皆脫去

水鴉鵲一名四喜體小於鴉啄短而銳背生黑毛腹間以白結巢高枝好
事者畜其雄其音纍纍然如貫珠也

雞家禽也翼短體肥不能高飛雄鳴以時雌卵益人肉食均能滋養
董雞喙銳而尖足稍長羽斑黑立夏時遊行田間秧茂結巢叢中晝夜
皆鳴其聲董董穫稻方去

秧雞銳喙長足小如雛雞色褐黑有斑紋惟喙兩旁毛白俗謂白臉秧
雞其聲聒聒然七日夜方產一卵晝夜鳴不絕聲產之難與黃色爲黃
秧雞惟尾稍長其聲鳴鳴然產卵時亦晝夜鳴不休

野雞形狀習性與雞相類雄者美麗目赤尾甚長雌則否棲息山野食
穀類嫩葉及蟲且侵及嘉禾害鳥也漢呂后名雉故諱稱野雞至今沿

之縣中惟東里多有以山大也

金雞色黃如金羽兼五彩尾長華瑩山有此種

竹雞短尾褐羽飛不能高常羣遊竹間鳴聲不已捕者聚葉爲埒埒間開多門以繩套置門口急逐之則受繫矣或不設埒套被逐急則入頭葉閒俗謂作事不顧後者爲竹雞形相傳人家飼之可避白蟻

鴨家畜之水禽也嘴扁平足短趾有連蹼能浮水古謂之鶩
水鴨一名鳧狀如鴨而小常棲息水邊雄者毛羽甚麗能高翔體肥多脂肪供食品甚美

鳳鳴形似鴨而稍大不入水澤毛羽有光其冠狀肥大如鳳頭故名
鴿與鳩同類有野鴿家鴿二種野鴿全體暗黑惟背之中央爲灰白色頸及胸有紫綠色之光澤羣棲深林中出食田禾爲害鳥之一種家鴿爲野鴿之變種形態毛色各不同飛翔頗捷記憶力甚強放雖遠能自歸軍中用以傳書故古稱飛奴

鵝一名鴈莊子主人畜二鴈鴈卽鵝也昏禮奠鴈用之毛白嘴長軀體肥滿尾足皆短其黑羽者曰蒼鵝

雁與鴈同狀似鵝嘴長微黃背褐色翼帶青灰色胸部黑斑其聲嘹唳其飛能自成行列秋來春去故謂之候鳥其大者曰鴻
燕卽乙鳥取其呼鳴亂也體小翼大尾分岐如翦喙短口潤頰肥背黑腹白春時巢於人家屋梁兩兩對語縣中小女常學其語如不喫你穀子不喫你豆子借你房子生個兒去音頗肖之春分前後來自煖地巢於屋樑秋分後復還煖地

鷺鷥水鳥也好潔白一云白鳥頂上有絲毳毳然近尺欲取魚則弭之光緒朝西人購此毛甚貴重獵戶執鎗常斃此鳥拔毛幾於絕種昌運舊時於安岳道中見有人持毛有尺四五者又有頂長尺有六寸渠誇市利云自合州某鄉得來也毛十六疋賈重二十千俗謂之白鶴謬
馬鼻梁喙銳而堅短足健羽尾長尺黑白相間背綠黑腹白頭項翠綠春至每乘五更學眾禽語學貓無不似者古謂之百舌鳥一云反舌
青椿原名鸛又名鳧雁形較鶴小而頂不丹頸嘴皆長全身灰白色翼尾皆黑常立水澤飛則伸其腳詩鸛鳴于垤卽此一作冠後漢楊震傳有冠雀銜三鱸魚置講堂前亦卽鸛雀

山咤咤原名鷓鴣形似斑鳩頭如鶉臆前有圓點如珍珠背有紫赤浪文其鳴聲如曰行不得也哥哥性畏霜露夜棲以木葉蔽身逐月而飛飛必南向

陽雀嘴扁平上嘴末稍曲體瘦尾長背淡黑腹白有黑條紋又名子規名杜宇江右曰子規蜀中曰杜宇夜啼達旦血漬草木苦則倒懸於樹自呼謝豹其鳴似云不如歸去遵義府志引本草杜鵑小如鷓呼鳴不已蜀人見鷓而思杜宇故名金川瑣記綏靖屬之遜克宗地名有一種雀形如鳩長尾常自呼曰貴貴陽晝夜不絕聲土人曰爲陽雀云係雀王深棲叢莽不喜飛翔日俟羣雀供蟲豸此雀非蟲不食夜間與蚪月子規空山答響倘亦開明魂化歟按本草綱目李時珍引諺云陽雀叫鷓鴣央鳩音桂卽楚詞之鷓鴣漢書之鷓鴣今郡人呼貴貴陽者字異實聲同也瑣記謂與子規別一鳥非是

水雞公原名鷓鴣如鴉黑色喙長微曲善沒水取魚一名烏鬼俗呼水老鴉

八哥原名鸚鵡身首俱黑兩翼下有白點翦剔其舌能作人言取其目

睛和人乳研滴眼中能見雲霄外物左傳鸚鵡來巢卽此

畫眉全身黃黑色其眉如畫巧於作聲如百舌然亦有純白色者人家多籠蓄之以善鬪爲良又有金畫眉一種

白頭翁體小全體灰黑腹白翼尾皆黑而帶綠老則白頭故曰白頭翁冬日羣棲原野鳴聲喧噪

黑鵲喙銳尖頸圓春至則鳴其音若換工做活又如阿公阿婆又如割麥插禾又如早早布穀又如薈早苞穀古謂之布穀鳥又如勿偷花果又如莫損花果謂之護花鳥自春苦啼至于五月人謂其年必豐收浙西比戶養蠶熟則架山置蠶於上下灼以火故又以灼山看火名之皆以其聲之相近耳秋後化爲鷓列子曰鷓之爲鷓鷓之爲布穀布穀久復爲鷓此物變也

翠形畧似燕翡爲赤羽翠爲青羽又雄赤曰翡雌青曰翠其羽可爲糝飾品近水澤捕者以網拔其綠毛仍釋之

鷓鴣本二鳥名今混稱鷓鴣誤鷓本作鷓鷓屬與鷓同類異種狀亦相似惟羽無斑點頸腳皆長棲息茅葦間捕食小蟲魚舊有鷓鴣斥鷃等

稱鶉形如雞雛頭小尾禿嘴腳均短背深褐色翼黃褐色皆有黑斑腹赤白色性活潑喜跳躍猛鷲能搏鬪有馴養之以游戲者

鷹猛禽也其類甚繁嘴鈎曲而強兩翼張度二尺許背暗褐色腹白色有黃褐色之橫紋腳凡四趾三趾向前一趾能前後回轉各趾有鈎爪勁而有力眼甚銳敏盤旋空中無微不矚獵者多飼之

鷓似鷹而小背黑有光尾岐腹有黃黑或赤白色之斑點善摯

鷓亦摯鳥似鷓羽色青黃燕領鈎喙向風搖翅常擊鳩鴿燕鶻食之

斑鳩原名鶻全體淡白色自肩脊至尾皆灰褐色後頸有黑色半輪環唐書禁進犬馬鷹鶻卽此

麻雀多巢人家簷下褐色有黑斑其翼右掩左雄左掩右雌陰陽相下之意也又云糞尖者爲雄糞圓者爲雌亦謂之瓦雀

點水鶻形小如燕羽雜黑白二色其頭頻向水邊俯點頗有抑揚之致故名

鐵稜甲身小如鷹力能捕鷓覺軒雜著此鳥大如畫眉尾岐如魚尾背距如鐵身黑色故名短小精悍鷹鶻之所畏也嘗坐庭中鷹下攫雞雛

合川縣志卷十三 土物

四十一

去此鳥二疾去如風撲鷹左右鷹毛散落雛墮地復生

點燈捉蛸蚤蜀都碎事春時每至夜半有鳥鳴其聲云點燈捉蛸蚤土人云昔有夫婦爲蚤所苦夜起點燈時久雨屋頽壓斃遂化爲鳥飛必匹偶鳴必相應亦可異也

啄木官嘴如錐長數寸常斲樹食蠹蟲啄震木蟲駭動出則食之或云

嘗穴樹居土人塞其穴布灰于地至而不得入則下畫符灰上木塞自出土人卽灰土遂寫其符以咒鎖往往有驗○森楷附記

蓑衣背或曰背**毳**鳥性質與白鳥相似毛麻黃而細棲止隨處非若白鳥擇林而植也

黃瓜鶻一名春規又名陽馬以此鳥見則杜鵑將至如陽雀之馬也毛羽燦爛首有花冠而不鳴飛則冠羽紛披散如花朵

十姊妹狀似雀而小黑身青嘴飛必成羣

急性鳥似十姊妹而小色青黃調清可愛其性急羅得之卽死

紅衣娘一名紅裙身綠尾紅

春夢鶻每至春初五更後萬類俱寂輒自鳴其聲婆婆連綴不斷鳴息天破曉矣俗謂之春波羅其鳴終輒云挖孔挖孔故亦謂之挖孔雀兒

梁山伯祝英臺一名練雀似山雀而小頭上披一帶白色雌者尾赤雄者尾白今人謂雄者爲梁山伯雌者祝英臺

偷敲鵲體最小尾稍長金黃色性矯捷輕利好鬪春日結巢竹枝產育最富人家多蓄之

口袋鵲小於麻雀喙小而短尾長金黃色結巢小樹及麻林中產育成羣食蕎麥雜糧人恆惡之至覓土中小蟲而食又似有益農家者

娃娃雞毛色斑駁聲最宏大遠聞數里必春分始鳴夏至則歇其聲若呼娃娃綳倒故名

鵠鵠大如鷹頭目如貓有毛角兩耳晝伏夜出鳴則雌雄相喚其聲連轉如休留休留故名鵠鵠 右禽類

羊家畜有角者也孕四月而生其目無神五行屬火故易繁而性熱性善羣有褐白黑三色繁露曰有角而不用類如仁者執之不鳴殺之不嗥類死義者飲乳必跪其母類知禮者羊之爲言祥也本草盛言羊肉主治尤多以其跪乳類孝勸孝者嘗舉羊爲例方無角者曰童羖牛家畜之反芻類也體肥重性馴而力强故農家多畜之以助耕作其

合川縣志卷十三 土物

四十二

特性爲食草不先咀嚼先入胃受胃汁軟化變爲小塊復推出上入口
■腔細嚼糜爛然後再下食道以資營養故曰反芻其肉與乳皆爲滋養品有水牛黃牛二種牡曰牯牡曰牝兒曰犢俗謂牝牛爲沙牛
犬家畜之一輕猛好鬪其視覺聽覺嗅覺皆敏銳雖卧易醒故善守夜又能縱跡獸類以助田獵別有形較小而毛尤光潤者人多畜爲玩品俗呼京狗茸毛斗尾者爲哈叭狗縣中往往有之非常產也

豕亦家畜通謂之豬爲野豬變種體肥滿鼻長尾短其性喜輾轉於泥水中以冷身體每年產子二次每次至十餘頭甚繁殖其牝者爲豨亦曰彘牡者爲豨俗讀彘如脚

○森楷案豕亦有一年三舉者己未年我家則然

野豬卽家豬原種腳長腹小皮生粗毛體色黑褐牝者犬齒强大向上彎曲鋒利無倫棲息山野春夏之交夜出覓食冬則穴居肉味鮮美又一種似野豬嘴尖足短冬季愈肥肉尤美俗呼泥豬以穴土居也

馬芻食之畜類牝者曰騾亦曰沙頭頸與鬣俱長蹄極堅重而僅有一趾其齒有乳齒永久齒之別形態隨年齡而異故相馬必先齒

騾本作羸驢馬相合而生體格强健能任力役馬牝驢牡則其種強驢

牝馬牡則反是

驢體小於馬耳頰皆長體毛夏爲黃色冬爲褐色鼠色背中央有黑線一白鬣直達至尾性溫順能負物

豹似虎而小背赤黃色有黑斑紋如錢腹白行甚速攀緣樹木性凶暴喜捕食他獸有金錢豹艾葉豹二種以其斑狀別之

豺狼屬形類犬毛較深喙長口大體瘠而性猛能食人

狼形似犬而瘦口大喙長腳有蹠能涉水多臭氣性極殘捕食弱小動物往往害及幼兒光緒末東里頗多數食人畜後不知所往

狐狸體大於貓灰赤色有黑黃紋惟狐體瘦而長狸肥而短其尾俱長好食魚及鼠亦名狸狽

猿猴形狀類人能坐能立四肢皆如手各有五指前肢大於後肢性慧善摹倣猿猴同屬惟猴類有鬆皮如囊可貯食物名頰嘍臀部有堅皮裸出其色紅赤名臀疣且有短尾猿類無之以人類學言猿類人猴類犬其區別以此縣中常有人弄以爲戲然非縣產也或云華銀山有之貓善捕鼠目中瞳孔能應時伸縮故夜能見物聽機亦銳足行無聲趾

閒藏利爪以攫物舌面粗糙如錯有一錯爲一坎九坎七坎者良

野貓狀似家貓惟嘴較尖而齒較銳行尤敏捷夜入人家攫食畜類其皮可爲裘

耗子原名鼠亦曰老鼠穴處人家生殖極強生百日卽能產子每年四產每產五頭至十頭各國因其爲黑死病傳染之媒介防捕甚嚴

黃鼠狼原名鼬體長尺許或赤褐色或黃色四肢短小其行甚速通過隙穴如蛇類善捕鼠夜出喜竊食人雞因逐捕窘迫則其肛門腺道能放惡臭使人難耐以圖脫人謂之救命屁尾毛可製筆謂之狼毫

鼯睛似鼠而小尾短鼻尖常棲土中食昆蟲蚯蚓之屬俗呼山耗子兔埤雅曰兔吐也或云望月而孕或云舐雄而孕生子從口中吐出其居三窟其毫可作筆罕見近所畜者乃碩鼠狀似兔而色白眼紅尾短耳大上唇厚中縱裂上達於鼻前足短善走其產於縣中者毛多白色或褐黑色野兔無黑白者偶見之則羣咤爲祥瑞云

彪鼠產華蓋山茂林中形類鼠而大與貓等其色黑其皮效用較狐尤佳常在林中跳擲而行飛速如梭土人謂跳擲爲彪故偁之彪老鼠古云

蝙蝠一名仙鼠又名飛鼠現今博物家列入獸類爲翼手類之哺乳動物前後肢均有膜連之故能飛翔空中捕食蚊蟲全體密生暗灰色之毛口齒銳利後趾短爪可鈎物而懸身以哺乳其子故爲哺乳動物
獾子亦偁狗獾體小而肥尖喙矮足短尾毛深褐色皮可爲裘食蟲蟻瓜果穴土而居或作獾窠並通

獺長二三尺尾尖長如錐四肢趾間皆有蹼善游泳水中捕魚傍河岸穴居營漁業者多豢之以其形扁亦偁扁子

麇貓屬形似貓而毛較粗硬其健長者可製筆韓愈詩下言人吏稀唯足彪與麇卽借此托興

果子狸形似野貓而嘴微尖尾尤長大褐色有斑紋皮可爲裘慣食果實因名

九節狸形似果子狸而大色褐黃有斑紋尾圓長毛黑白相間成圈形如九節然故名

山羊爾雅名羴羊生巖穴中皮可作鞞 右獸類

蜂有君臣巢曰蜂衙種類甚多尾皆有蠆惟黃蜂無毒能採百花釀以

爲蜜其王所居爲蜂臺羣蜂視爲聚散王死則不復釀蜜相守待盡蓋蟲豸中有倫常之義者也可收養於家歲取其蜜

蠶環節蠕動腹胸及尾有足六對專食桑葉蜀名蠶叢以此其幼蟲成長必蛻皮數次當蛻皮時不食不動二三日謂之蠶眠經三四眠始上簇作繭在繭變爲蛹又由蛹化爲蛾形則吐唾液使繭受而軟化破之以出是謂之蠶蛾欲取絲者常乘蛾未出繭時取之因出繭則絲緒斷絕不復能繅也野生者爲害蟲之一種然亦有取其繭以繅絲而作用者謂之山蠶別一種非害蟲也

蝴蝶一作蝶一名蛺蝶俗呼蝴蝶爲毛蟲烏蠅等所化體小四肢大埠雅曰蝴蝶以鬚嗅種類甚繁爲各蠹蟲之母園藝森林家皆忌之

蟬善鳴大別爲夏蟬秋蟬二種四肢膜質薄而透明其發聲器在胸腹交界處有小皺膜又有三角形之筋肉收縮振動以發聲舊說蟬以翼鳴非也

螢夏日腐草所化長一二分善飛夜間腹部發磷光雄者光尤大其幼蟲匍匐土中亦能發光

蛙水陸兩棲之脊椎動物體短闊上銳下廣好棲陰濕地雄者善鳴雌則否色淡綠背有黃色縱線者曰金線蛙俗呼田雞體小色鮮綠者曰青蛙其全體作暗褐色背痒磊行動舒遲者名蟾蜍如蟾蜍而善躍者名蝦蟆皆能捕食害蟲有益農家其幼蟲爲蝌蚪有尾如鱧魚狀蟻本作螳體有黑色光澤巢於地中或朽木上羣棲成一社會分女王蟻職蟻雄蟻三種女王蟻雄蟻主生殖職蟻主營巢取食其大者曰蚍蜉又一種色灰白翅長逾體生朽木中嚙蝕木材俗呼曰白蟻爲害甚烈相傳聞竹雞啼則化爲坭故屋生白蟻之家輒畜竹雞相制焉
螞蟻原名蛭產溝池之溜水中及田中體黃褐色有黑線形似蚯蚓輪紋甚多口腔有緣如鋸齒喜附人畜肌膚吮血醫者常用以吸取病人惡血白墜泥田尤多鴨屎泥田亦有之投蠟或石灰其中則絕
蠅種類甚多最著者爲黑蠅大麻蠅青蠅等大二三分黑蠅體色灰黑夏初集腐物中大麻蠅頭赤褐體較黑蠅畧大青蠅分小大二種小者形同黑蠅大者形同麻蠅惟背皆青色秋時最多產卵於食物及穢處其幼蟲爲蛆又有綠蠅一種

蚊其幼蟲爲污水中孑孓老則變形爲蚊如蛹之成蛾也體灰黑色或斑色亦有黑色而體極細者名墨蚊其喙俱如鍼刺含有毒質故人被嚙後肌膚必腫相傳產于五倍子實中

地虱原名廔形畧似鼈生牆壁下及陰濕處

蝮蚤體扁六足善跳夏月生於燥地雌大雄小喜附人畜之體吸血

蠹魚一名蟬分二類在木中者曰蛀狀類小蠹又一種體小被銀白細鱗尾有二岐能食害書籍衣物之屬

臭蟲卽木蝨體橫扁而平頭小胸部膨大有多數環節常匿牀第及木凳隙間吸食人血亦名逼火蝨縣人謂之肥螿其實卽尔疋之蟹也

蜘蛛體分頭胸部腹部狀如囊口有大小腮左右各一大腮有毒腺腳四對肛門前有突起如瘤者六出絲製網捕昆蟲而吸其血液性殘忍同類相食種類頗多大要皆有絲腺者

蟻子蜘蛛之一種一名蠪蛸體細長褐色前肢之長三倍其體網輪形人見之以爲喜兆故名

斑蝥有毒可入藥生豆葉上翼有黃黑斑紋

螳螂或作螳螂頭扁平眼高突前胸延長如頸前肢變形如鎌所以襲物後肢長善躍多食害蟲於農家有益俗呼青猢猻

竈雞一名蟠蟀一名莎雞一名促織長六七分喜鬪棲於瓦石間全體褐色有薄翅秋時振羽作聲雌者翅短尾岐爲二二尾間有褐色鍼土狗原名螻蛄穴居土中而鳴形如蟋蟀腹大頸圓長雄者有翅夜飛喜就燈火爲小麥葡萄等之害蟲淮南子孟夏之月螻蛄鳴

丁丁貓原名蜻蜒春夏間由水蠶在水中羽化而成頭大腰尾甚細而長尾岐翼薄如紗飛翔較蜻蛉爲遠善捕空中飛行小蟲及蜂有紅黃白三色皆墨色環節繞之小如鍼而紅色古謂之赤弁丈人

曲蟻原名蚯蚓體圓而細長多環節紫黑色穿穴土中流通空氣故能使植物成長爲農家間接之益

壁虎一名守宮體扁平色灰暗有四足肢端平闊善附著他物遊行牆壁等處捕食昆蟲爲有益動物古曰蝮蜒

四脚蛇古名蜥蜴如守宮而短小褐色又名石龍子名山龍名蛇師偷油婆卽蜚蠊夏秋間廚中甚多長寸許觸角長行極速前翅小後翅

合川縣志卷十三 土物

四十六

大適於飛翔全身油黑色觸之則放惡臭口有利齒嚙物易損

蓑衣蟲卽蚰蜒頭與軀幹皆暗黃綠色有黑斑夜則捕食昆蟲行速

蟻螬金龜子之幼蟲生園圃中長寸許首赤尾黑以背行其迅逾腳蝕果樹等物

蛻娘背有堅甲全身色黑如漆喜運糞推轉成丸一名蛻蛻莊子蛻蛻之知在於轉丸卽此俗呼推屎八

蚱蜢雌長寸許雄者畧短色綠或褐後肢大善跳首圓眼大自幼時卽食稻葉之害蟲也蓋卽蝗之一種

蜈蚣生陰濕地體細長頭足赤色背暗綠腹黃有足廿對長者達四五寸螫人有毒偷油婆能解之性能制蛇蛇類畏焉

蝸牛一名蛞蝓軟體動物之有肺者外殼扁圓無厝體柔軟平時全體縮入殼中行則伸出頭有觸角四其二較長尖端有眼頭側有小孔內爲肺囊以通呼吸腹部之兩端伸展而成足分洩一種黏液以便移動其體乾則成薄膜光澤如銀常集於草叢樹蔭之濕處蝕害綠葉

土鼈形如鼠婦團而赤色常伏土內斷而續之復活能治折傷血症

筆袋形長不及寸色赤傍樹根吐絲結囊上繫於樹身伏囊底飛蟲黏囊上卽升而食之出囊卽不能動畜畫眉者覓作飼口謂有補益蛇脊椎動物之類其種甚多大都爲長圓筒狀修尾無足以脊椎自由伸縮而行全體被鱗紋透明之表皮年年更脫謂之蛇蛻舌分裂兩歧齒曲如鈎其有毒者別具毒牙二穴土而居冬伏春出其常見者有松花青竹黑三棱濫草等名

地牯牛形似地蝨而大色灰褐頭有二角常伏石縫間能將泥沙衝成圓窩如牛觸物然故名 右蟲類

鯉爲魚之主形既可愛又能神變脊中鱗一道每鱗有小黑點文大小皆三十六其種易蕃

巖鯉卽魴也似鯉頭小腹闊扁身細鱗肉膩味鮮

青湧似鱮而頭稍小背青黃腹白而大多黏液俗呼白鱖

鯉魚魚之有肚者形似江團而頭圓大口闊有黃白二種易生甚速鯉之美在頭其腴在腹

江團魚之有肚者形似鯉而頭部較團色淡黃而白皮肉細膩味極鮮

合川縣志卷十三 土物

四十七

美其美尤在頭故俗呼肥頭亦謂肥鰾鰾讀如它

清波形似鯉而色微青有光滑肉膩味鮮刺不碎雜

白甲亦似鯉而甲極白三四月多有之分單唇雙唇二種雙唇者其味尤佳

草魚亦似鯉肉不甚細其大者重數十觔

沙辣子體三稜形色黑紅背脊隆而無散刺味美

象魚又名鯖鼻長如象俗名劍魚又名箭魚皆取其似也其美在鼻可爲膾

水鼻子魚鱗細而多刺味極鮮美口圓者俗呼爲圓口味尤佳惟出水不耐久故名之曰出水爛卽桃花魚也以桃花時出故名

黃蠟丁形似小鯉鱗刺銳健背脊黃而腹微白大者尺許煮食味鮮

鯽魚一名鮒形似鯉脊尤隆起而狹鱗圓滑頭與嘴皆細背微青黑腹白多產塘堰水田中

薄刀片一名翼魚體扁而色白如薄刀然故名鱗細多刺

烏魚形畧似鰻背有七星文色褐黑有斑紋常藏泥淖中生育頗繁

白鰱原名鰻體長爲圓筒狀尾稍扁多黏液鱗紋細而口闊脊部蒼黑色腹部白黃色味鮮有滋補效

鱖俗名扁頭魚背青黑而腹白與鯉相似長數寸大者尺許

泥鰱形似鰻而短小體圓尾扁有黏汁常潛泥中

白鰱卽鯪也其色白肉肥而刺極細

鰱一作鱖腹黃脊褐似鰻而細長頭部下有腮孔二內有腮腹中有肺或謂之氣囊

團魚原名鼈背甲褐色腹白口尖邊緣柔軟成肉裙多滋養分

龜腹背皆甲僅露頭尾及四足出入之孔甲之表面成紋雌者背甲隆

凸雄者平頭似蛇性遲鈍耐饑渴壽長古用龜卜故稱靈物

螃蟹頭胸部甲甚闊至腹漸小腹甲有橫紋足五對第一對爲螯橫行甚速川中無之惟有似蟹之蟛蜞耳縣人所呼之螃蟹實蟛蜞也

蚌殼介屬之圓形者外褐黃色內白色肉可食一名蛤蜊俗呼圓蛤

螺螄原名蝸贏介蟲之有硬殼可以宛轉藏伏者其類甚多水陸皆有之陸行者名天螺螄蝕害植物稚葉樹藝家忌之

合川縣志卷十三 土物

四十八

蝦節足動物之長尾者體長寸許多環節外皮成甲殼色灰白薄而透明有觸角二對甚長俗謂馬蝦去殼可煎食以佐酒生則醉蝦熟則蝦仁美味也縣人多和麪油煎之可惜也又一種體細而色微赤殼較薄溪谷甚多亦可食之 右魚類

金合州貢麩金

新唐書

所以遵王也普天之下莫非王土貢所以盡臣子

之職黃金多生成自然者亦有與銀及他金合者純金則其色黃有銀則其色微白凡生金之礦與他金之別以刀截之能成薄片撻之能扁不致碎裂大約茸金居多產於沙中可以淘洗得之

礦學心要上

合滙三江

下流至渝入大江三江曰涪江由太和場訖青龍嘴入嘉陵水曰渠江由葉子溪訖渠河嘴入嘉陵水兩江各有沙岸淘金絕少惟嘉陵江自金子沱下有老觀埡又下有斗笠口又下有殺水灘又下有瓦窰灘下至金沙磧地脈旺甚州人以防於風水禁不許以下則菜壩王家河壩照鏡河壩虬門河壩皆金場也

銀少生成自然者每與他金和合吹火試之易鍊得銀成珠而有角入硝酸中消化以淨銅入其水銅上有銀色其硫磺銀礦吹火試之有硫

氣能鍊而不能得銀必與鉛同鍊方能得銀入硝酸銷化以鐵試之鐵面有銀色以銅試之銅面有銀色又與硼砂同鍊能得純銀又有黑銀礦吹火試之有硫磺氣成暗黑珠再與素特同鍊得銀又有紅銀礦亦名佩霞銀礦吹火試之有砒烟能鍊得銀又有角銀礦其色灰黑或綠藍色視之如角亦如蠟吹火試之易得銀礦學心要上縣東里木龍洞半山地名銀廠坡有礦色白如銀明嘉靖萬厯間開礦處也旁有太監墳當時辦礦死者相傳以爲弊政故今人少業此

銅生成自然者多吹火試之能鍊得銅珠有別金在內則其珠爲他金所包須用硼砂及錫箔點之則銅自見入硝酸能消化以淨鐵試之鐵上有銅色其中有銀者磨平之其形或如線或如點朗朗可見又有玻璃銅礦吹火試之內有火硫磺烟外火則發泡入硝酸熱之能消化硫磺沈於底其與銀礦之別以入酸硝化以鐵試之鐵有銅色若銀礦以銅試之銅有銀色又有硫鐵銅礦其中有鐵識別之法色細黃而輒者其中銅多若色淡而硬者鐵多銅少又有紅色銅礦火試皆得銅珠酸試皆能消化惟成色不及自然銅礦又有硫酸銅礦可以染色印花可

使木不朽肉不爛凡硫酸銅礦穴中有水流可以鐵換得之其法於水之經過處掘地作坎坎中置鐵五百噸一年之久其鐵消化變爲紅上每一噸鐵得一噸半土其每噸土內有一千六百磅淨銅又有炭酸銅礦吹火試之有細細爆裂之聲入硝酸消化如沸我華鑄錢大半此銅曾擲鐵於硝酸中見其有此狀故知其爲炭酸銅無疑又有夕里開銅礦附於他礦之皮亦有結成土塊之粒形者吹火試之變黑不鍊硼砂點之微鍊入硝酸不生氣不能全消化其淨者有三分銅不淨者十分銅又有磷酸銅礦亦附於他石之面吹火試之不鍊熱之有磷酸形迹綠氣銅礦色綠或黑綠吹火試之有綠氣烟能鍊得銅珠試銅之法先以火試置小塊於笊熱之辨其氣味知其中或有礦有砒如二者俱有每礦粉一觔和木屑半觔以油濕之置笊中熱之以出其砒烟研碎之置淺鑕中燒紅而調攪之則礦及炭分矣礦學心要上縣中左瀛初由勸業養成所畢業呈縣中三倒拐寨子嚴青桐坪杉樹林觀音巖多銅礦質申報公司見礦業掌錄

鐵礦一類西人謂其石皆從天降語甚奇怪而泰西鐵礦果皆取此種

石鍊之易得鋼鐵中國則仍入山取鐵與煤相近閒亦有山上黑石紅石能鍊成鐵者特我不知取耳但所產既多質亦不貴只須爐火鍛鍊自得純鐵故未深考礦學上鐵礦有青紅二色其佳者能抽絲開皮鑄鹽鍋造兵器鍊蘇鋼等事無論青紅皆以潔淨爲上又紅泥鐵礦外面與黃泥無異見火卽溜汁鑄成生版可以鍊鋼礦學上縣中鐵礦附炭而生凡有炭者皆有鐵礦近年鐵器甚貴如鐵釘一項先年每觔價七十近則三百文矣飯鍋五百文者近亦兩千文吁貴亦極矣攷縣中高爐歇業由於柴火艱難讓渠縣太平等處獨擅其利今渠縣太平柴火亦盡故鐵賈之貴如此聞西人鑄鐵近時以炭礦代之實業家果能□吾縣庶有豸乎

鉛礦無生成自然者每與他質相合故不易鍊惟吹之於木炭上則有養氣白鉛如烟升起熱之多有電氣鉛之脈見於外者其石有青黑花形平地一條隱隱隆起或一條凹下其地有一種獨異之草木自成一路皆爲有鉛之據礦學上鉛礦有白鉛有黑鉛色黑而質軟皆含銀質除提銀之外鍊可升提硃砂新紅鉛可作細粉鉛粉卽此也礦學上錫

合川縣志卷十三 土物

五十

金有六齊六分其金而錫居一謂之鐘鼎之齊五分其金而錫居一謂之斧斤之齊四分其金而錫居一謂之戈戟之齊參分其金而錫居一謂之大及之齊五分其金而錫居二謂之削殺矢之齊金錫半謂之鑿燧之齊周禮皆錫之分劑也凡鉛錫各礦及爲錒爲鎳各視所出探礦者自能辨之縣中未能具有今不贅

硝取地硝洞硝爲二種地硝縣中各處房屋均有硝洞則油礦石常有洞而多礦質其餘各山亦有洞可熬磺附炭脈而生縣東里永里均有炭礦凡炭窰有水其色純黃在澗底者皆是各地採礦有硫磺

吾合東里永里出炭爲最就今時言之有泡夾硬墨炭鍋巴炭鷄窩炭小沙連大連子立朝大連泡大連小連窄炭等類又有奔洪■江之內外九連各地各名如攤子礮之同心廠洪泰祥三連子也黃毛坡杉樹林水碓子老廠溝板橋灣牯牛坪易家灣楓木灣半坡上下巖灣雙連子炭也保和場之黃葛灣邪石壩陳廠瓦窰灣和尚窰子河溝窰子猪槽巖寬炭也櫻桃灣莫家灣三連子炭也饒家灣黃葛灣夾子炭也沙子灣泡夾硬也梓潼宮獨連炭也弔鐘寺窄炭也師灘橋之白峽口窰

葉溝芋荷溝仰天窩梭羅溝鐵爐溝小沙連也三滙壩之通橋小沙連也嵩芝河茶園廠大連子也觀音巖立朝大連也荒溝老鸛窩田溝耿家灣楓木樹彪水巖木龍洞茶葉保泡大連也鄧家茶園小連也近有油煤糠煤之說油煤入爐見火發泡成果烟子極濃烟過始然糠煤見火卽然亦無甚烟惟起火時有聲響油煤銷路最廣糠煤爲輪船火車之用然終以燒得爲限燒得之炭起方墩有寶色必輕必堅

紙今之徵礦產稅者曰煤曰鐵曰紙紙是以副之縣多山東里草街子龍潭漕龍洞沱灘子礮太和場車山口獅灘場多紙廠永里鹽井溪十塘深水井亦多紙廠爲白紙爲草紙爲紙殼大抵山多畜竹竹有筍筍爲竹原料白紙純用筍也草紙則用老麻筍之老者或老竹以稻草爲大宗若紙殼則純用稻草無需細料也白紙爲用較廣縣中尙不敷用草紙則有冥錢食菸草並用以接火紙殼則用以包裹禮果茶點無不資並行別縣近時亦貴極如灘子礮大合草紙五十張爲一合三十年前每合十四文近亦漲至九十文矣各紙廠亦類此

石粉永里毛家堰近銅梁界其地出石粉色白石類消化成泥土人摶作方形約半觔一條發草紙廠白紙廠用以撲摑紙兩方紙爲增色又漆工繪塑神像各縣船舟多載而市於市價甚廉

石砂石西里雲門鎮禹王宮牌坊石柱爲通省之冠鄉人艷稱之大石橋可爲倉板薄寸許寬常尺有奇長則五六尺八九尺不等砂細而緊色浸紅爲錫工鑄錫夾板石賣錫糖鑄糖人有面石始能鑄必取此永里石馬山石可磨刀各縣推菸重渠縣重夔大河瀘縣各屬賴之又光緒時成都商業場取一石闊二尺長五尺抬至省城不惜其費牛鼻峽砂粗而堅中作磨子上下來往常買之油礦石自永里十塘而南漕老鴉溪過河自麻柳坪蘇家漕鴨兒蕩黃砂漕銅鼓漕三滙壩皆油礦石微白油浸有極黑者爲皮蛋色可碑可鑄刻可爲染房踩滾可爲大棧捶整可鑄人物作坊作石柱作石桅高可兩丈大宗則燒石灰峽中礦石燒石灰前每觔一文近貴至十文惟鳳凰溪石石碑最劣硯石出麻柳坪王姓專此利白石自江津接縣之十塘至東里聶家山止十塘有盃廠至麻柳坪兩路口有廠有水車或不濟然較各廠便甚由麻柳坪一走龍潭漕盃廠林立一走深溪溝水常不乾無停車尤爲得地至石灰漕

寨子頂有廠嗣則聶家山有廠近日盪買較三十年前買增數倍每窟可出一百餘千錢矣

礬紅取炭礦似銅色者熬之爲礬渣復爲紅東里之仙鵝抱蛋大土坪兩山下溪水縈紆草木不生多礬陽姓謝姓世爲業又車山口某姓就溪水亦開礬廠貨出龍洞沱 右礦類

有志者曰萬物滋生本乎土而物之養人莫如百穀故土物以穀爲先天子祈穀重民食也食之美者珍饈不如菜蔬蔬首菠菜先貢物也物之生者如草之茁先萱草重母德也萱茂椿榮人生至樂故草次以木草木春而含華花首蘭以先王者秋而結實果先壽星橘是有壽相木必有所附藤首葛藟庇本根也根不外向竹實具之首慈竹竹能醫俗醫以藥行列椒子重繁衍也擇木者良禽首烏鳥重反哺也鳥與獸比羊能跪乳物之美焉由是有蟲蜂明君臣之義由是有魚鯉爲魚中之主懸魚辭金有清德者尙焉魚次以金開元貢品連類以及而礦類終夫玄黃剖判貴賤以陳物物者靡物不物有恒性哉自西風東漸謬悠之口倡爲平權自由之說家庭革命倫教不修得不有感於物猶如此

人何以堪

補遺

草類藜草即燭麻黔蜀有之生於籬落溪厓間葉類麻多毛刺螫人手足腫痛至不可忍杜子美所謂草有害於人曾何生阻修其毒甚蜂蠆其多彌道周是也不知者往往為其所中比其毒於蜂蠆蝎蝮殆不為過鉏而去之置諸水中勿使滋蔓所以遠惡也然土人采之沃以沸湯則可已風亦可肥豕世固無棄物哉以章子厚而治軍以韓侂胄而傳旨非盡無濟顧用之者何如耳宋祁益部方物志於燭草亦云葉能螫人有花無實冒冬弗悴可以祛疾古人謂是草堪醫信哉

木類陳懷仁青桐樹考遵郡本蜀地多產桐樹名曰青桐呼家宋書

載開寶五年資州獻梅青桐二木合成連理桐名繫青要以色耳而稽古家皆不言其枝葉形狀何若第篇海註云高木故人每以榦檉橡櫟雜當之而不知判然三木惟以為榦檉者是也其見於詩曰檉檉爾雅曰檉樸心郭璞註曰榦檉別名榦檉生高數尺之時歲當蠶月出山蠶蛾子蠕蠕然散置樹上聽其眠食食盡人復為枝枝相換葉葉相移至三眠後作繭滿樹垂垂遵地舊多其樹原無山蠶先蓋有於山東之安

合川縣志卷十三 土物

邱石門諸處見司農孫公廷銓山蠶說及王漁洋清溪榦葉始濛濛樹底春蠶葉葉通之山蠶詞乾隆初年郡守歷城陳公玉壑始自其鄉攜種來遵親教民以飼養之法其飼也懼鳥啄而銜咸作棚廠於野伺逐之必設位祀陳公於廠不忘本也若夫橡亦一木而數名俗呼水青桐

紅者呼為紅網絲山海經景山之杼爾雅之桐杼詩之苞栩柞枝漢之五柞說文

集韻之樣皆橡也榦與橡俱有斗斗包其實之半榦仁止痢功同橡栗但橡葉不似榦葉之可飼蠶染阜家之所用榦斗不及橡斗之佳作炭則榦勝於橡作器則橡勝於榦各有其宜耳至於櫟有椹全包其子呼俗

榦櫟與榦橡之斗不同因榦葉之形稍同櫟而木性之堅韌同冬青冬

青名榦故有稱榦為青榦者後呼榦為櫟於榦子亦稱櫟榦子均比擬

之詞非以榦即榦更非以榦即櫟也而橡之於櫟尤相混淆詩之苞櫟本別於苞栩也郭註爾雅於栩杼下云柞樹不兼言櫟也於櫟其實椹下云有椹彙自裹不兼言柞也惟陸璣詩疏緣秦人謂柞櫟為櫟徐州

人謂櫟為杼或為栩遂據難據之方言指苞櫟為柞櫟又指苞栩為柞櫟以房椹釋苞櫟句之柞櫟又以阜斗釋苞栩句之柞櫟此無論於秦

人以外不可加柞於櫟亦於徐人以外不可以杼爲櫟也卽似形似不妨概稱豈有同一柞櫟忽房椽而忽阜斗者乎房椽之爲櫟阜斗之爲柞櫟子味甘柞子味澀栩不與櫟混櫟自不與柞淆也乃博雅如羅徽五之講經李雨村之平谷詩亦復訛以傳訛信救荒本草合械樸栩櫟橡栗青櫟而一之不察檉樸榭檉之俗呼家青櫟者爲一木橡樣栩杼柞之俗呼水青櫟者爲一木而櫟之俗呼榭櫟子者又爲一木正字通旣斥陸璣及本草合橡櫟之爲非顧不自知合柞櫟亦悞則甚矣稽古之難也

心齋集森楷案此文頗詳瞻惟櫟字不見於宋書當作宋史而宋史太祖紀五行志並載其事頗不可解或引他書而憶訛耳